



帶經堂集卷四十四

歙關文程哲校編

漁洋文六傳辯記事

新城王士禛

賜書

藏書

貞烈韓孺人傳

順治初王師定山東探丸嘯聚尚遍六郡劫掠玉帛子女無虛日長吏束手不能禦丙戌丁亥間高苑賊謝遷聚衆數千人連破新城長山諸縣入淄川據之僭偽號置官屬至勞禁旅蕩滌始就誅彝方是時朝廷旰食將帥坐甲累日月而長山太

常王公楨妻韓孺人以一女子抗節罵賊死甚烈

三十四

漁洋文卷六傳

一

賊平鄉大夫洎三老以狀上巡撫中丞將聞於

朝會以代去不果於今二十五年矣康熙壬子歲

太常公以書抵京師謂子傳之子自巾角聞孺人

死節事甚悉孺人於法當得謚太常而太常公在

章皇帝時居門下爲諫官力可以自達於上顧猶

有待於子今日之言予慨焉作韓孺人傳韓爲淄

川著姓自嘉靖以來冠蓋相望孺人父某三歲失

怙母畢育之年十六歸太常甘澹泊躬勤儉荆布

操作事舅姑聽而婉相夫子柔而正中外無間言

太常好讀書爲文章聲名藉甚孺人紡紵劈絮以

佐之無倦寒暑丙戌太常成進士官中書舍人將以孺人入京師孺人愀然曰舅年老矣子姓雖衆然君家督也今以王事不遑慮遺堂上憂有婦在朝夕奉慰老人猶君在也遂不行踰歲而賊陷長山孺人被執怒罵曰吾家世清白無長物有死耳朝廷何負汝曹而甘作賊旦夕下偏師磔汝矣賊怒孺人罵益厲遂遇害時順治四年四月二十七日也又四年太常自中書舍人推擇爲給事中會覃恩例贈孺人

論曰昔歐陽子論次五代之臣自梁迄周得全節者三人而已謂於是時責士以死則天下無士獨於號州司戶叅軍王凝妻李事咨嗟歎息三致意焉著之馮道傳首豈非以巾幗大節足愧士大夫之瑑瑑波靡者邪若孺人者其視歐陽子所書抑又難矣庸次其事實以告史官云

### 李母刁孺人傳

孺人姓刁氏鄒平人歸長山李公世熙有子八年九十有二以卒以第三子祐之仕爲雩都縣知縣覃恩封孺人李氏爲濟東鼎族朱丹其轂者項背相望最著者太子太保刑部尚書化熙監察

御史文熙公尚書弟侍御兄也尚書既予告歸養  
十餘年而一品太夫人宋壽登百歲有司以 聞  
朝廷嗟異之下 詔建坊表旌其門曰貞壽山

以東冠蓋咸集羅拜於堂太夫人從堂上答拜尚  
書兄弟皆皓首蟬貂章服列侍左右衣冠榮之於  
是尚書年近八十公與孺人亦七十餘矣公八十  
有五考終又五年而孺人卒視貞壽太夫人之年  
纔減其八耳春秋二百四十年間錄婦女之賢者  
三人宋伯姬之貞紀叔姬之義聖人皆謹書之書  
其卒書其葬不一書焉然彼不幸而丁身世家國

之變君子嘉其賢而又悲其遇其處常而見錄者  
惟魯之敬姜一人而已敬姜言必合經博達知禮  
教其子為魯賢相宜為聖人之所予孺人之事舅  
姑也聽而婉其相夫子也儉而勤其教諸子也恩  
不掩義例以春秋之法宜得備書孺人初于歸家  
故貧也逮事舅姑箴管滄瀦必敬必戒與諸娣姒  
以織紵紡績相尚門以內無勃谿及析產受田厘  
十畝孺人佐公治生身操井臼絲穀絮帛權其盈  
縮與時消息家用以饒諸子就外傳擇嚴師賢友  
與遊皆為聞人迨既貴象翟之外不御紈綺其可

書者如此若夫好行其德族鄙緩急不以有無爲解尤婦人之所難子植之順治辛卯舉人衍之辛卯副榜恩貢生祐之無爲州知州佩之邳州衛守備扶之侯銓知縣芾之武舉敬之容之皆教諭女二人孫男二十一人曾孫男十三人

王節母徐氏傳

節母姓徐氏長山人也父通薊道僉事日升以萬曆壬子冠山東解額爲時大儒人稱海曙先生母年十六歸諸生王先生雲舅滄若公罷處州推官歸病亟母侍湯藥宵衣者夔門屏間浹十旬不怠

姑許孺人病母以身代枕時其輾側一七一衣不敢諉左右卒不諱髻而泣血佐外治罌葬必信必誠繼祖姑楊太孺人性嚴毅母婉嫕得其歡心常呼吾孝婦孝婦云年三十三先生不祿母幾以身殉時有子孫枝洎四女矣乃更輟泣撫諸藐孤身兼鞠育孫枝旣成立能文章好交遊所與游皆嚴師賢友孫枝每引衽攘捲而親饋之母乃喜所居當濟青萊諸郡孔道諸名士與孫枝游者結駟連騎騰笈牆進母躬爲勻藥漿饌乙夜不少休歷數十年無倦色孫枝嗜讀書不問家人生產又多四

方交家以中落母欣然不以屑意客至更翦髮坐  
薦供酒食遠近稱曰賢母諸女既有家皆以勤儉  
著聞遵母教也先生有兄妣遺三女母撫之親為  
結褵如己出孀姊適鄒平張氏有兩孤養於家延  
師訓之長萬綏成順治丙戌進士張氏姑貧老具  
棺槨葬之以禮更為其子買田築室族鄰待以舉  
火者常數十家康熙甲子正月二十八日卒年八  
十有七子一人孫枝昌邑縣訓導女四人適耿弘  
熺李本泰韓廣居安履孫二人積桓曾孫二人河  
源樂源士禎於母為族子悉母家世行誼因次為

傳

三九二

漁洋文卷六 傳

五

論曰傳云婦人學於舅姑者也事舅姑而孝可謂  
難矣不幸夫死立孤教之讀書取友終成名士不  
尤難乎魯敬姜教其子文伯以周公桓公下人之  
道范達謂陶侃母湛曰非此母不生此子彼二母  
者古之賢媛也母無惡焉

劉烈婦郝氏傳

明崇禎四年叛將李九成等叢難吳橋反戈而南  
破山東一郡五縣殺人如草十二月七日陷新城  
劉前徽妻郝氏死之初賊得郝飲之酒郝擲杯於



事舅姑他日叔有子為以者立後歲時奠麥飯一  
盂足矣姑力持之曰婦在如吾兒在况婦有女何  
死為其母管亦痛哭諭止百端烈婦一不答徐曰  
志決矣義不忍棄死者獨生從容焚香告柩前顧  
家人曰吾即死洗含勿近男子遂自經距其夫死  
僅三日年二十有四宗鄰聚觀莫不彈指泣下事  
上撫按將疏聞於朝會二東有兵事不果又踰年  
而賊陷京師明社屋矣後三十九年敬中弟翰林  
檢討澄中乃以子沂為其兄後成烈婦志又述烈  
婦事狀命子為傳

三方幸

漁洋文卷六傳

七

論曰明季壬午癸未間二東婦女死者衆矣或死  
倖執或歿道路山谷流穴轉徙等死耳令烈婦當  
日不即死而死倖執歿道路其於輕重之數何如  
哉士大夫不幸遇大故苟且濡忍不勝其富貴妻  
子之念身名既敗而猶詫於人曰吾之不死者將  
以有為也夫不歿則竟不死矣若此者皆烈婦之  
罪人也

董烈婦孫氏傳

東海高士曰董樵其為人磊砢負奇節隱居盛山  
久之稍稍出遊吳越江淮間賣藥自給予識樵在

十五年之前相遇廣陵別去又八九年已見諸京師慨然謂子曰樵不德去年中子道廣歿婦孫同日以身殉死甚烈徒以貧賤見格於有司不得上聞於朝以表暴於天下後世吾負烈婦矣言已泣下子嘗備官禮部闡幽表貞子職也且念樵之意有足悲者作董烈婦傳

烈婦孫氏棲霞人諸生士彥子歸萊陽董樵子道廣樵客即墨而道廣病烈婦方歸省父母心動趣歸道廣病且殆烈婦瞑目絕飲食矢必死三日道廣歿烈婦從容告廟與姑劉氏訣劉曉大義知事

不可已以頭觸壁血流涕泗被面烈婦弟仲桂長跪慟哭請緩須臾死弗聽或曰前年叔死娣不歿何居烈婦曰娣有遺腹義不得歿吾無子義當死尚何言願仲桂曰歸語父母勿過哀女無以答劬勞是所以報耳遂自經歿康熙九年七月六日也訃聞其母哭之慟士彥曰有女如是於吾足矣何悲為於是海岱間人莫不奇烈婦之節而多士彥之賢者

論曰國家重倫常崇教化凡窮谷僻壤義烈之事令有司條其名狀歲以上聞何其視匹夫匹婦之

行若是重與勿亦以其有關人心世道而然與唐李習之碑高懸女曰賞一女子而天下勸亦王化之大端也奇節如烈婦而使之湮沒草莽事不上於禮部名不登於太常誰之責與誰之責與

### 五烈節家傳

孫孺人世父曲江公元配也鄒平人寧國府經歷孫公棧長女子先慈宜人爲同生之姊年十六歸曲江公時先曾大父司徒公曾大母路太夫人先大父方伯公先祖母成淑人兩世在堂孺人婉孌柔順皆得其歡姑成張二淑人繼卒諸弟妹幼穉

三万七千

漁洋文卷六 傳

九

皆恃孺人衣食方伯公歎曰吾再失內助諸幼孤不失所家益治者冢婦力也崇禎丁丑曲江公省方伯公卒於武林孺人哀甚誓歿自是長齋禮佛不關門而語三尺之童不入中門又六年而有壬午之事先是戊寅本朝大兵入關自畿輔下山東破濟南遊騎東至長山距新城十八里不攻而去之至是壬午冬再入關以十一月至濟二十九年日駐兵新城陷之孺人投井死時崇禎十五年十二月初一日二子士瞻士鵠乘城家人聞變皆散走惟小婢侍側知狀越三日軍退士瞻兵歿士鵠

以婢言號於井而出之顏色如生年五十八

于孺人青城人世父侍御百斯公元配父永清官御史孺人性凝重不妄言笑百斯公官翰林御史在京邸孺人皆從公為庶吏孺人益相勸勉故公歷巡鹽課茶馬清貧無長物孺人有助焉甲申三月賊李自成陷京師公號踊期必死家人環泣或婉轉解壁言孺人與子士和獨不語以四月二十六日與公登樓士和從門閉久之不出家人急闢戶視之已同縊梁間公左孺人右士和在公下而士和妻張氏先以壬午十二月城陷自經死孺人歿

時年五十五

三才六十一  
漁洋文卷六 傳

十

張氏新城人生員炳然子戶部主事羽鳳孫也歸從兄廩生士和性質素有荆布之風壬午十二月初一日城陷自經東閣中以髮覆面初先宜人與張對縊先宜人繩絕不死時夜中喉咯咯有聲但言渴甚士禛方八歲無所得水乃以手掬魚盞冰進之以書冊覆體上又明日兵退得無歿視張則久絕矣

張氏亦羽鳳孫生員炯然子歸從兄舉人士熊士熊字渭濱先世父壽三公長子以壬午舉山東鄉

試甫三月城陷與壽三公母弟生員士雅皆乘城  
歿張氏二十一勵志守貞與士雅妻高一燈紡績  
奉孀姑劉二十載順治己亥卒無子

高氏士雅之妻淄川人推官瑋侍郎珩妹也于歸  
三歲而士雅殉難高年甫十九有一女撫之成立  
居常衣布食粗糲有人情所不堪者或難之曰未  
亡人耳得此以為幸元旦一拜家廟先宜人在時  
間歲歲朝或一至餘日未嘗履闕三十年未嘗見  
齒家世貴盛諸兄皆宦遊澹然如田舍女子殆易  
所稱苦節者也康熙戊午疽發背卒

三十五七  
漁洋文集卷六 傳

十一

士禎曰先方伯公教家嚴閨門之內儼若朝典又  
嘗以先高祖母劉太夫人闡範圍說教諸婦女皆  
凜然知禮義榛栗棗棗脩秩秩如也壬午甲申之間  
諸母而下節烈輩出孰謂非方伯公之教漸漬使  
然哉春秋于宋伯姬之卒既書其葬又載其謚予  
死義也會有 命開館撰修明史謹撫次事實俟  
史氏節取焉

木瓜詩辯

詩衛風木瓜三章序曰美齊桓公也疏引左傳齊  
侯使公子無虧帥車三百乘以成漕歸公乘馬祭

服五稱牛羊豕雞狗皆三百與門材歸夫人魚軒重錦三十兩齊語曰衛人出廬於漕桓公城楚丘以封之與之繫馬三百序謂衛人欲厚報之而作是詩正其事也序之言與左氏內外傳悉合自鄭康成孔仲達而後如歐陽永叔蘇子由呂伯恭嚴華谷鄭夾深黃東菴王觀國諸家皆主序說至朱晦菴獨廢衆說臆斷以爲淫奔之詩噫亦可謂固矣門人輔廣心知其非又不敢斥其師說則穿鑿傳會以求合而不知其愈不可通也輔氏童子問云有學者請於先生曰某於木瓜反復諷詠但見

其有忠厚之意而不見有褻慢之情小序以爲美齊桓恐非居後揣摩者所及竊意桓公旣歿衛文公伐齊殺長立幼衛人感桓公之惠而責文公之無恩故爲是詩以風其上不然則家語所謂吾於木瓜見苞苴之禮行焉豈鑿空而爲此言乎先生以爲不然曰若以此詩爲衛人欲報桓公之德則桓公之惠何止木瓜而衛人實未有一物以報之廣謂以此言之則小序之說亦傳會之失實無所據而先生疑以爲男女贈答之詞則亦以衛風多淫亂之詩而疑其或然耳至於家語所載孔子之

說乃王肅所纂集固難盡信且與小序之作未知其孰為先後又烏可據以為說哉廣之言支離可笑如此因其師之臆說而欲廢小序因并孔子之言而欲廢之祇見其愚而自用己矣是詩之作或在桓公戍漕城楚丘之時或在文公伐齊之後皆不可知然其為思報桓德無疑也他如將仲子之刺莊有女同車之刺忽風雨之思君子子衿之刺學校廢序說皆確不可易而晦菴槩以為淫詩輔氏又曲為之說以濟之他日晦菴賦白鹿洞云廣青衿之遺問樂菁莪之長育自與其言相杻鑿毋

亦悔前說之非而欲然於小序之終不可廢乎先儒或謂大序作於聖人小序作於衛宏或謂大序作於子夏小序作於毛公唐成伯瑜曰衆篇之小序子夏惟裁初句其下皆大毛公自以詩中之意而繫其辭宋王得臣曰關雎后妃之德也此一句孔子所題其下乃毛公發明之言諸家之說序大抵如此歐陽子本義多駁毛鄭之失而於小序獨謂與孟子說詩往往有合後儒異說害詩當以序為證程子云詩小序皆得大意又云小序當時國史所作大序則非聖人不能作使小序可廢則漢

隋以來諸儒其說皆出晦菴下乎諸儒之言即不可從伊川則晦菴所私淑也將其言亦不可訓乎晦菴嘗注楚辭矣楚辭言美人言公子言蹇修亦將以為男女相悅之詞而斥之乎若近世所傳子貢詩傳以為朋友相贈賦木瓜雖與序異視晦菴臆說猶為近理然詩傳出近世好事之所為其謂朋友相贈又因孔叢子之言而傳會之不足信故當以序為正

金人南遷錄辯

按金史世宗十子顯宗衛紹王而下則永中孰輦

斜魯永功永成永升永蹈永德無允猷之名永升初封徐王章宗即位徙封隋改曹又改宛衛紹王即位改封夔宣宗時以永升年高詔宮中聽扶杖貞祐中薨自世宗迄宣宗時已歷四朝矣蓋諸王中最老壽者且於顯宗乃第八弟非世宗長子也世宗本紀大定二年五月壬寅立楚王允迪初名迪允恭為皇太子三年命皇太子親王射柳於廣樂園是年十一月己丑封子永功為鄭王亦非三年始立太子封諸王也允迪即顯宗世宗嫡子史稱其專心學問於承華殿觀書乙夜忘倦尤敬禮儒臣鄭松

詹事烏林答愿入謝命取幘頭腰帶見之或曰此見宰相師傅之禮太子曰愿事陛下久以此加敬爾常作重光座銘及刻左右銘於小玉碑皆深有理致其賢如此太定二十四年世宗幸上京太子監國二十五年六月薨侍衛軍士爭入伏哭聲殷如雷中都百姓皆為位而哭二十六年立子璟為皇太孫是為章宗顯宗在東宮事蹟始末如此安得有南涼觀被殺之事耶又顯宗后乃徒單氏章宗明昌二年崩謚孝懿史稱其好詩書喜老莊學純澹清懿造次必以禮錄乃稱章宗母趙為降授南宮千牛將軍楷之幼女抑何其誕謾不根邪世宗賢君也而詆以新臺之行尤為謬妄小說之無稽如此輒令鹿馬混淆白黑雜糅貽誤後世不淺偶讀金史輒因賔退錄辯駁所未及考其顛末著於右方俾後之讀此錄者勿惑焉

章宗以太和六年崩完顏匡等傳遺詔立永濟是為衛紹王錄載牛刀兒弑章宗兀映等立磁王允明宦官趙元德等復行弑逆張克己等乃立灘王允文謚磁王為昭宗云云皆似夢囈語金九主遇弑者三熙宗海陵衛紹王是也史皆

特書此錄架空構造半屬子虛亡是殊駭聽聞  
其他紕繆尚多聊舉其大者數條於此

章宗時宋韓侂胄啓邊釁南北連兵吳曦因以  
蜀叛尋即議和罷兵至衛紹王初元始來伐此  
錄言愛王請兵北國云云皆妄也

書劍俠二事

新城令崔懋以康熙戊辰往濟南至章丘西之新  
店遇一婦人可三十餘高髻如宮妝髻上加氈笠  
錦衣弓鞵結束為急裝腰劍騎黑衛極神駿婦人  
神采四射其行甚駛試問何人停騎漫應曰不知

何許人將往何處又漫應曰去處去頃刻東逝疾  
若飛隼崔云惜赴郡匆匆未暇躡其蹤跡疑劍俠  
也從姪鵷因述萊陽王生言順治初其縣役某解  
官銀數千兩赴濟南以木夾魚之晚將宿逆旅主  
人辭焉且言鎮西北里許有尼菴凡有行橐者皆  
往投宿因導之往方入旅店時門外有男子著紅  
帽頭狀貌甚獐至尼菴入門有廨三間東向牀榻  
甚設北為觀音大士殿殿側有小門扃焉叩門久  
之有老嫗出應告以故嫗云但宿西廨無妨久之  
持硃封鐫山門而入役相戒勿寢明燈燭手弓刀

以待曙至三更大風驟作山門轟然而闢方愕然相顧倏聞呼門聲甚厲衆急持械謀拒之辭門已啓視之即紅帟頭人也徒手握束香擲地衆皆仆比天曉始甦銀已亡矣急往市詢逆旅主人主人曰此人時游市上無敢誰何者唯投尼菴客輒無恙今當惶慙耳然尼異人須吾自往求之至則嫗出問故曰非爲夜失官銀事耶曰然入白頃之尼出嫗挾蒲團趺坐逆旅主人跪白前事尼笑曰此奴敢來此作狡獪罪合死吾當爲一決顧嫗入牽一黑衛出取劍臂之跨衛向南山徑去其行如飛

倏忽不見市人集觀者數百人移時尼徒步手人頭驅衛返驢背負木夾函數千金殊無所苦入門呼役曰來視汝木夾官封如故乎驗之良是擲人頭地上曰視此賊不錯殺却否衆聚觀果紅帟頭人也羅拜謝去比東歸再徃訪之菴已空無人矣尼高髻盛妝衣錦綺行纏羅韞年十八九好女子也市人云尼三四年前挾嫗俱來不知何許人嘗有惡少夜入其室腰斬擲垣外自是無敢犯者某中丞巡撫上江一日遣吏齎金三千赴京師途宿古廟中扃鐃甚固晨起已失金所在而門鑰宛

然怪之歸以告中丞中丞怒亟責償官吏告曰償固不敢辭但事甚疑怪請子假一月往蹤跡之願以妻子為質中丞許之比至失金處詢訪久之無所見將歸矣忽於市中遇瞽叟胸懸一牌云善決大疑漫問之叟忽曰君失金多少曰三千叟曰我稍知蹤跡可覓露車乘我君第隨我冀可得也如其言初行一日有人烟村落次日入深山行不知幾百里無復村疇至三日踰亭午抵一大市鎮叟曰至矣君但入當自得消息不得已第從其言比入市則肩摩轂擊萬瓦鱗次忽一人來評曰君非

此間人奚至此告以故與俱至市口覓瞽叟已失所在乃與曲折行數街抵一大宅如王公之居歷階及堂寂無人戒令少待頃之傳呼令入至後堂堂中惟設一榻有偉男子科跣坐其上髮長及骭童子數人執扇拂左右侍拜跪訖男子詢來意具對男子頤指語童子曰可將來即有少年數輩扛金至封識宛然曰寧欲得金乎吏叩頭曰幸甚不敢請也男子曰乍來此且好將息即有人引至一院扃門而去餽之食極豐腆是夜月明如晝啓後戶視之見粉壁上纍纍有物審視之皆人耳鼻也

大驚然無隙可逸去傍徨達曉前人忽來傳呼復  
至後堂男子科跣坐如初謂曰金不可得矣然當  
予汝一紙書輒據案作書擲之揮出前人復導至  
市口愴怳疑夢中急覓路歸見中丞歷述前事叱  
其妾出書呈之中丞啓緘忽色變而入移時傳令  
吏歸舍釋妻子豁其賠償吏大喜過望久之乃知  
書中大略斥中丞貪縱謂勿責吏償金否則某月  
日夫人夜三更睡覺髮截三寸寧忘之乎問之夫  
人良然始知其劍俠也日照李洗馬應廡聞之望  
江龍簡討變云

帶經堂集卷四十四

帶經堂集卷四十五

歙門人程哲校編

新城王士禎貽上

漁洋文七

墓表

誥授奉政大夫吏部稽勳清吏司郎中葉菴

王公墓表

有明正嘉以後關中衣冠甲族首咸寧王氏王之  
先世有隱德至御史江涯公諱懋始大其家江涯  
公有丈夫子六最貴者太子太保南京吏部尚書  
三渠公諱用賓母弟陽武公諱用賢有子十人其  
四爲贈光祿大夫吏部尚書桂園公諱昌功有子

三九甲

漁洋文卷七

墓表

一

六人貴者四人最著者光祿少卿光庭公紹先吏  
部尚書弘庭公紹徽光祿仲弟襄庭公紹翰始居  
三原以鄉舉官止郟縣令贈中書舍人君郟縣少  
子也母曰趙宜人諱九鼎字金鉉一字葉菴郟縣  
公與冢子工部郎中之鼎同舉萬曆己酉晚乃得  
君早露頭角順治辛卯舉於鄉辛丑成進士康熙  
己酉除東光令東光畿輔邑夙叢逃盜君至申禁  
令嚴捕緝逋盜屏息民絕株蔓縣鹽額引千歲爲  
民累君力請減其半又修廟學繕城堞築河堤作  
人禮士教化大興三輔吏無出其右知東光五年

內擢中書科中書舍人尋以清望推擇入吏部歷  
文選主事稽勳員外郎康熙戊午奉命典河南  
省試所拔皆單素時論稱之己未秋有浙撫某中  
丞察審之案上特簡君往報命稱旨調考  
功員外郎進稽勳郎中辛酉冬朝議九江關移樵  
湖口不能決命朝官往勘吏部以司屬名上

上曰王某可蓋自浙江報命後上固有意進

用君矣君感激殊遇不遑啓處往返四十日跋涉  
六千里冒風雪犯霧露歸次涿鹿而疾作然猶力  
疾入見奏事畢始敢退休私邸臥疾甫十日遽捐

賓客君長身玉立風度凝遠有公輔之器又能決  
大疑斷大事以是受知主上駸駸大用而公竟

不能待也詎不惜哉當明正德中江涯公以行人

諫止南巡廷杖幾死嘉靖初以御史疏救議禮諸

臣被謫為高縣典史世稱遺直迨三渠公復以忤

分宜相歸雖登三事論者猶以未竟其用為天下

惜光祿冢宰而後僉謂似續在君顧中道賈志以

歿此予所為臨文三歎而不能已也君學問淵雅

每與予論史事上下千百年皆有據依尤工書法

雅不欲以文士自見故不具論著其服官立朝之

槩如此然亦足傳矣生以故明天啓丙寅十月初四日亥時卒以康熙二十一年正月三十日巳時得年五十有七 覃恩 誥授奉政大夫配李氏贈孺人繼楊氏王氏贈宜人繼蕭氏男子三人長夢翼歲貢候選學正次夢庚長安庠生出爲冢宰公後次夢燕女子二人長適涇陽庠生趙之翼次許字劉祖鑣孫一某長安庠生

誥授朝議大夫廣東按察司僉事提督學政  
張公墓表

廣東按察司僉事提督學政海豐張君與予舉禮

三九七

濠洋文卷七 墓表

三

部稱同門友又同爲京朝官交最暱康熙壬子予奉諱里居君出官粵東亂定聞君無恙致事歸歸甫一載而訃至嗚呼君歷漲海萬里蛟鱷瘴癘崎嶇不測之險而得不死歸臥田廬而以末疾遽不起其命也夫君諱爲仁字致堂別字滄粟其先自昌黎遷海豐曾祖著祖金始大其家號義井張氏父應科始教子孫服儒衣冠 皇贈朝議大夫廣東按察司僉事母孫氏繼母朱氏俱贈恭人朝議公六子君最少少讀書不爐不扇順治丙戌有芝生於所居之處是年秋再行鄉試君適內艱服闋

遂膺薦君顧愀然曰祿不逮養終身之戚也屢困公車益發憤著書隅說闡明考亭之旨濟北學者師之乙未釋褐己亥除內黃縣知縣甫下車見諸務窳惰慨然曰天下事無今日不爲而來日徐圖之理於是相其緩急而次第布之初謁夫子廟見學宮就圯鼎新之進諸生以時講藝其間以演武場偪處學宮相度改作自時厥後得雋者彬彬多文學焉又勅義學聚民間子弟莒秀者教之嘗出行阡陌間師弟子數十人迎道左辟咄應對皆有規矩君頷而樂之縣俗尚氣好鬪民間或詬誶輒

自殺諍訟無已君反覆諭以律例俗大變縣有大姓馬氏同室相傾軋君爲立族長設約束諭以水木之誼久之遂爲義門其治先教化如此嘗步禱神祠雨立霑足歉歲損俸輸穀設粥廠十二以食餓人縣食鹽額四百二十引累年額銷不足齏使者議按丁加引君爭之曰內黃昔羅兵燹民多流宄有數家包一里之丁者有一人包闔戶之丁者額鹽且壅矧加之厲乎縣有太僕寺牧馬草場三百餘頃畝徵銀一釐六毫有奇民苦之君分俸代輸後議畝加練餉一分浮正供且什倍力請如故

縣有衛所軍地奉檄歸縣未有成例軍民更相齟齬君酌為成規立符契過割軍民皆聽之縣例有通州料豆協運船胥吏埠頭率斂法賄賣其富者君為立法各河口輪次公運或不足則官給其直吏無所售其奸縣故有驛置自河決後使節稀少減舊額之半後舊路復通額卒未復君為力請驛困以甦縣城袤廣四里餘邏卒無幾君選牌甲壯丁千人復其徭役更番戍城如踐更然縣外城久圯而居民鱗次君請於上官以農隙修築不日而成之立鄉長團練土著遇盜警互為聲援又為尺

籍伍符令游手無所容河北回龍鎮四縣分轄久為盜叢君移文鄰縣約期會集比戶登名於版製令箭四押以四縣符篆而分掌之有事得徑治無相瞻顧而均其力役自是無竊發者盜王三者劇拳勇久不能制君計禽之寘諸法境內肅然君在內黃也慮不能周知民隱擇鄉三老愿謹者月以望前一日赴廳事條上利弊某宜興某宜革使人人得盡其意參伍行之故所措施率宜於民略其大者如上十數事其細微顧不能盡書也居三載舉卓異第一賜朝衣一襲壬寅擢中書科中書舍

人丁未遷刑部江西司主事歷江南司員外郎郎  
中以才能推擇修大清律改訂吏部條例有重囚  
八十餘人已擬辟詳引律例爭之得改正發遣其  
平反多此類焉京朝官十三年凡甄別者三京察  
者二皆書上考甲寅擢廣東按察司僉事提督學  
政東粵號才藪君與諸生約頒示六條大指以器  
識爲主而文藝次之凡故例與學政全書相踈鑿  
者一切更張之務寬大不爲苛細平生好獎士類  
經其指授率舉制科登館閣知名當時內黃則李  
滋黃本訥兩浙則沈三曾許汝龍仇兆鰲粵西則

黃裳吉曹雲鷺粵東則鄭際泰而吳三畏以武進  
士廷試及第第一此其尤著者丁巳以病乞休歸  
里立族社每月朔具牲醴墓祭合族之長老子弟  
生平遇父母諱日修祀事輒流涕極哀諸兄龐眉  
皓首事之恭謹俸祿必與共之視兄子如子親睦  
族姓無甚富甚貧者學不泛涉務由洛閩微言以  
上求聖賢之意其教子姪曰吾生平得力數言而  
已生於憂患死於安樂此心纔放禍即伏焉愛人  
者人恆愛之敬人者人恆敬之持身涉世之道盡  
於此一夕得風疾七日卒君一爲順天武鄉試同

考官一為廣西鄉試主考官再奉 詔使蜀使江  
南一權關杭州四遇 覃恩初授階文林郎再授  
奉直大夫進朝議大夫再賜表裏生以故明萬曆  
甲寅四月十四日卒以康熙十八年五月初二日  
得年六十有六配畢氏封恭人子二人玠理女二  
人適楊法李爾夔孫六人賡泰颺泰方泰始泰旭  
泰丕泰予惟西漢之盛所以上繼三代者循良多  
而吏舉其職也然班史所書蕭曹開國名相惟以  
寬厚清靜為天下師而文翁董仲舒兒寬之屬或  
云經術潤飾吏事或云仁愛好教化如是而已跡  
君之治內黃可以無愧所謂為民去害興利若嗜  
慾者非耶為法吏則惡深文為人師則以教育為  
先合前後觀之可以為循吏矣於是玠理將以某  
年某月某日葬於某阡而予為表其墓

誥贈中大夫山東都轉鹽運使司運使王公

墓表并銘

山東都轉鹽運使司運使千峰王君以書來云先  
王父體乾府君之歿餘四十年矣墓道之石闕焉  
子有宗人之誼文之者其在子未幾而千峰捐賓  
客嗚呼緒言在耳何敢忘乃取公父明初先生所

次行實爲表俾鑱諸墓上先生諱養元其先自婺源徙南陵曾祖諱某祖諱某父諱某世以厚德爲鄉三老先生天性孝友家貧竭力供甘盲兄弟四人將析爨田宅臧獲自取其最下者兄某得篤疾一子幼弱藥餌襲斂悉身任之不以累其孤母疾焚香告天割股以療其行誼過人率如此讀書嗜左氏史記尤好信陵君魯仲連傳每流連三復慨然思友其人於千載之上好爲人排難解紛邑中豪強凌弱暴寡者輒畏先生知之爲諸生五十年不以尺一干長吏爲文章清古自名一家視程式

漁洋文集卷七 墓表

八

三石九

之文齷齪不足措意以是老困場屋晚年撫孫奐曰汝大吾門恨吾不及見也後竟如其言生以明隆慶庚午九月九日卒以明崇禎壬午正月十一日得年七十三康熙十七年以孫奐遇 覃恩

誥贈中大夫山東都轉鹽運使司運使元配紀氏繼配葉氏皆贈安人子二人學大即明初先生

誥封山東都轉鹽運使司運使今八十餘尚無恙學明孫四人奐即運使君稷國家恩曾玄孫若干人運使知河間督山東鹺政皆以循良有聞於當代則先生家訓可知也予生晚不及見先生得遊

於運使父子間竊附聞知之列詩曰貽厥孫謀以  
燕翼子惟先生有焉是宜銘

不在其身在其子孫樂石嶙峋表此墓門以昌厥  
後人

### 張學海先生墓表

先生諱繼倫字學海晚號雪松老人其先淮安人  
自處士友始遷安丘數傳至澄以明經主武安簿  
澄生守蒙守蒙生民感字霖海以子贈文林郎文  
林公生三子先生其第二子也兄嗣倫萬曆壬子  
舉人弟緒倫崇禎辛未進士官御史先生生三月

三才堂字

漁洋文卷七 墓表

九

而文林公歿稍長母王太孺人為擇名師授以尚  
書太孺人督諸子嚴每塾歸必命夜讀而自紡績  
其側先生與兄弟感母意競力於學先生少有異  
稟年十四補邑諸生天啓丁卯貢入太學崇禎庚  
午應山東鄉試主司賞激其文以多奇字置副榜  
是時以明經謁選人例得縣令不就初先生與其  
兄弟同有盛名於場屋至是兄弟先後得雋去願  
先生獨不遇先生自痛不逮養其父事母至孝太  
孺人以老壽終先生日夜孺子泣久而不衰少與

兄弟同學相友愛事孝廉君如父比病革藥餌必

親事丘嫂二十年不懈侍御君巡視兩淮齷政有  
巨商某罪當抵攜重貲走千里乞先生一言緩其  
獄先生艷然曰吾方以辦職勉吾弟願翫其法耶  
絕弗與通其兄弟間行義相成類如是尤為德於  
鄉黨明末兵興二東郡邑多陷薄安丘先生佐縣  
令纂嚴城守指畫方略城賴以完時流亡相屬凡  
入縣境者率收卹之亂定各遣歸其家有鄉人負  
幼女倉皇過門問之則將粥以償官錢也出金籬  
其負女得不粥有遠賈糴粟邑中將行發視半沙  
礫知為駟儉所紿然莫能誰何之先生為白有司

治如法賈竟獲原直歲稔有貧士數十人求發官  
廩不得先生慨然指困賑之甲申客青州時山東  
大亂賊魁趙應元自長山夜襲青州入之先生間  
道跳歸有識之者曰勿驚長者卒免於難先生長  
九尺美鬚鼻貌矍然以清嗜讀書淹通經傳諸史  
旁至醫卜皆窮其奧書學蘇米晚得二王之神子  
又嘗從斷鱗見所畫風竹蕭疎圓勁節目磊砢想  
見其人非天機清妙不能造也嘗闢書室空無所  
有惟圖三代鐘鼎盂鬲之屬於四壁蓄一琴時撫  
弄以寄意夷然不屑也順治己酉復遊大學未幾

歸歸得痰疾四日卒先生有倜儻之才高潔之操  
既不用於世退而修行於家為德於鄉里故其可  
見者止於此而已生萬曆乙酉六月某日卒順治  
乙酉十月某日年六十一娶許氏河間縣知縣進  
之子前卒繼娶孔氏男子一人即貞康熙壬子拔  
貢官翰林孔目女子六人婚嫁皆名族以丙戌歲  
五月某日葬城東五里河之原於是距其葬三十  
有二年矣

吳臨穎墓表

康熙丙午歲子居京師一日於榮水部開邸舍見

三才子  
漁洋文卷七

墓表

十一

壁上詩署名曰吳雯者一再讀之愛玩不忍割去  
評水部誰何水部太息曰同年故吳君康侯之子  
雯幼孤肆力於學問所為歌詩數十百篇率可誦  
雯有母年五十有弟三人妹二人婚嫁皆仰雯雯  
年二十一再赴太原試於有司不見收家益落輒  
挾其文章北游京師謁父執之官中朝者久之無  
所遇雯有妹嫁安東縣旬月前襍被策蹇驢往江  
淮去矣逾二年戊申三月蒼頭通賓客視其刺則  
雯也躍起相見稍稍與談藝多微中詢其家門衰  
落之狀泣而言曰雯父以乙未第以丙申死顛沛

半生而不獲一日之安鄉國稱善士而不食一日之報年不及艾官不及生前乃於身後授官臨穎天乎悲哉言未既涕泗縱橫下予爲反袂久之自是與雯數飲酒賦詩歡相得也歲且暮一日雯請問曰雯將歸省母願雯父之歿也雯方十有三歲未能出遊當世賢豪長者乞其言以傳後世每一念之若負芒刺先生固天下之名能文辭者所以不朽雯父將在先生之言予哀其志乃爲據狀而表其墓君諱允升更名來亨字子公一字康侯世爲遼陽人少從其祖官雲南祖歿王事君獨與父客萬里外會遼左多故父隻身北歸視其家而留君於滇客中無書探篋中得漢書一部遂日夕讀之且讀且泣鄰有盧先生者聞而異之請與相見問讀何書曰漢書也叩以疑議應答如響盧先生者駭曰此非常兒引歸其家歲餘父再至滇乃與俱歸補定遼右衛諸生順治二年中鄉試七年就選人得蒲州學正會叛帥姜瓖據大同三晉震動蒲境時有竊叢事平奸人或藉以羅織善類君力請於制府孟忠毅公全活甚衆平居與諸人切磨爲文章勗以道義成就甚夥攝知滎河縣事以清

惠聞順治十二年成進士人方謂君長駕遠馭之  
才可以一試明年正月而君病且歿矣嗚呼可哀  
也唐元道州有言曰正直而無祿位忠信而久貧  
賤仁讓而至譽凶異於是者顯榮當世誰為辨士  
吾欲問之若吳君者可謂正直忠信仁讓之士也  
而坎壈摧折不得展布尺寸卒賣志以死豈非天  
哉君娶朱氏有子四人震霽霏霞女二人適陳發  
劉麟書孫一人江蘭雯出雯年少負才氣為詩歌  
文章踴厲風發非終貧賤者君未竟之志雯必繼  
之君可瞑也已

孝廉李君墓表

漁洋文卷七 墓表

十三

傳曰先王之制為三年之喪也使夫過者俯而就  
之不及者跂而及之也子夏除喪而見予之琴彈  
之而不成聲子張除喪而見予之琴彈之而成聲  
尼父皆無譏焉古道浸衰江河日下與其為師也  
者毋寧其為商也長山孝廉李君之沒四十年矣  
冢子孟縣君一日來謁予文表墓其容深墨矐矐  
然皇皇然若在初喪者可謂賢矣予方宅先祭酒  
府君憂感君意不忍終據禮以辭乃為之表按狀  
孝廉君姓李氏諱篤之字元根其先棗強人曾祖

芳洲翁諱某祖見山翁諱某父太學公重熙自見  
山翁已上三世皆以宮保公化熙九列 皇贈光  
祿大夫太子太保都察院右都御史君少有異稟  
日誦數百言號奇童爲諸生篝燈課讀如後門單  
素崇禎丙子歸安凌忠清義渠武進陳伊菴組綬  
典山東鄉試二公海內聞人得君文奇之以第三  
入中式明年丁丑春官下第已而庚辰癸未再報  
罷旣數困公車又遭世亂遂發憤嬰疾以死君少  
倣儻好振窮周急身為貴介而修布衣之行居恒  
請謝賓客如恐不稱有鄭莊之風客至輒流連閉

閣徵歌頌曲參橫月落飲酒至數斛不亂邑姚徐  
兩姓罵訟十餘年得君片言輒解牛某侵官帑株  
蔓親族甚衆君慨然白之釋無辜數十人俠聲流  
聞慕義者遠近如一東武王某為怨家所中其父  
兄謂曰必長山李先生也能活汝者扶服五百里  
及門君力出之無德色其勇於為義皆此類乙酉  
春感痰疾不起無知不知皆搯擊太息配趙孺人  
德言純備飯衣白業撫孤子二人皆成立布衣蔬  
食二十六年如一日焉君生以明萬曆丁未十二  
月初三日卒以順治乙酉二月初六日年三十有

九孺人生以萬曆戊申八月初五日卒以康熙辛亥八月十八日年六十有四子三斯升早卒斯恒貢士起家孟縣知縣斯孚廩生女一適予從姪啓溥太史公謂古者富貴而名磨滅不可勝記唯倣儻非常之人稱焉跡君生平折節善下緩急倉卒可恃拔人於危而不自為功所謂非常之人與顧連蹇弗遇年不及強仕惜哉予故表其梗概俾鑱諸麗牲之碑聊慰孟縣君之愾慕云爾禮曰父母既沒必求仁人之粟而祀之孟縣君將以予言為仁人之粟也予滋愧矣

帶經堂集卷四十五

帶經堂集卷四十六  
歛門人程哲校編

新城王士禛貽上

漁洋文八 墓誌銘

誥封中大夫通政使司右通政加一級開雍  
伊公墓誌銘

邑有篤行君子伊公諱光啓字開雍一字純仁其  
先自棗強徙新城祖澤父覺民 皇贈通政使司  
右通政加一級母宋氏贈淑人生二子公其次也  
兄光前公天性淳朴內行允謹事繼母董如所生  
三十年無幾微不豫之色事兄如父兄老無子以

三十四

漁洋文卷八 墓誌銘

一

長子闢為之後即中丞君士大夫所稱翕菴先生  
者也中丞既長不知己為伯父後蓋公夙昔未嘗  
一語及之慮傷兄意也兄既歿中丞年未及冠夷  
衾牆翬皆倚辦於公中丞與弟望江令嚙同時有  
聲塲屋公益課督不少假中丞以順治戊子領解  
額乙未舉禮部入翰林授御史望江亦以丁酉戊  
戌繼登甲科公始欣然曰乃今而後可慰吾父吾  
兄於地下矣中丞按山西游歷九卿開府望江一  
理寧國再知廣宗望江兩縣皆以清白著聞家無  
餘財公之教也中丞官門下省遇 覃恩贈祖父

皆中大夫通政使司右通政公亦以令甲得馳封如其官益自謙挹儉約居常布衣蔬食出則徒步無高車大馬兩君自宦邸製綺紈以進歲時一御輒筍而藏之時植杖田間與田父話桑麻量晴雨以此自適避竈爭席人我兩忘不知其身之翔貴也橫逆之來犯而不校有婁貞公呂許公之量故遠近稱為長者中丞奉命撫滇卒於軍朝廷恩卹甚厚時公年八十餘矣不啻神傷遂患目眚猶強飯無恙戊辰得末疾不起壽九十嗚呼洪範五福公可謂兼備之矣乃其終身蔬布居貴而善

下足以敦薄俗興仁讓為鄉里模楷尤人之所難能老成隄矣誰為典刑予能無臨文而悲歿瘁哉生以萬曆己亥年九月十二日申時卒以康熙戊辰年九月二十六日申時誥封中大夫通政使司右通政加一級元配耿氏誥贈淑人子二人闢順治戊子解元乙未進士巡撫雲南兼建昌畢節等處地方贊理軍務兼督川貴兵餉都察院右副都御史出為伯父後嚮順治丁酉舉人戊戌進士寧國府推官裁補廣宗縣知縣再補望江縣知縣女五人適王者棟王士慤呂斌張奎象郝彭年

孫五人作楫作梅作霖矩作德曾孫十一人應聘  
應徵應召薇應簡應舉應麒應掄應卜應知應選  
元孫三人清濤清溥清溶望江君以某年某月某  
日葬公於邢莊先塋之次先期來請銘銘曰  
泰山桂樹德之懋兮帶索行歌樂則壽兮不驕不  
侈昌厥後子丸丸松柏鬱且茂兮京兆之阡百世  
无咎兮

誥授資政大夫巡撫雲南兼建昌畢節等處  
地方贊理軍務兼督川貴兵餉都察院右  
副都御史翁菴伊公墓誌銘

漁洋文集八 墓誌銘

三

三十五六

世祖章皇帝御極之十有二年予與翁菴伊公舉  
禮部為同年生閱二十六年康熙庚申予在翰林  
而公以大理卿拜都御史出撫雲南明年六月訃  
聞京師予與其弟望江令嚟相向哭又踰年公子  
作霖走千里匍匐乞誌其墓一夕大雪被酒回憶  
三十年間與公遊好聚散死生之際有足感者因  
反袂濡筆而為誌按狀公姓伊氏諱闢字盧源別  
字翁菴系出唐僕射慎之後元末始自棗強徙新  
城數傳至澤始為公曾祖生效吾公覺民是為公  
祖 誥贈中大夫通政使司右通政加一級有子

二人長太恒公光前誥贈中大夫通政使司右  
通政加一級是為公父次開雍公光啓誥贈中  
大夫通政使司右通政加一級是為公生父公生  
而岐嶷與母弟燾同學齊名順治甲申乙酉間邑  
人士倡為曉社公兄弟為職志人稱二伊戊子領  
山東解額第一文傳四方乙未成進士世祖章  
皇帝留意人才初破館選分省故例駕幸南苑  
引見諸進士改庶吉士三十二人至公名上頌  
左右曰此山東解元有文名公之受知自此始既  
入翰林每御試唱名及公輒語左右如前丙申

漁洋文卷八 墓誌銘

四

三月八日  
四月特授科道若干人公授廣西道監察御史在  
翰林甫歲餘蓋異數也丁酉奉命巡按山西六  
月遇覃恩加一級公自念受上不次恩清白

自矢冀報稱於萬分一適前政以毛鷲為能公矯  
之以寬大而人皆肅然尤矜慎庶獄疏請減釋者  
前後至七百餘人凡有薦達必衷於公議如彭中  
丞有義卞司馬三元後皆開府為時名臣差竣遂  
掌京畿道事己亥九月與李御史森先同日内擢  
京卿公自授御史出按山西歸掌京畿道事以至  
內擢皆不次計資僅三載其受知之深如此尋宅

母賈太淑人憂以生母耿淑人卒請假治喪皆盡誠敬勿悔康熙庚戌閏二月補光祿寺少卿轉通使司右叅議是年十月擢右通政戊午九月轉左己未八月進太僕寺卿十月進太常寺卿屢遇躬祀郊廟諸大禮執事有恪上目屬之是年十二月遂拜大理寺卿班於九列會王師入滇填撫需才上環顧廷臣惟公謹慎可任遂以庚申三月拜公都察院右副都御史巡撫雲南兼轄建昌畢節等處地方贊理軍務公感激兩朝恩遇又以遐方新附

陛辭兼程而南時方溽暑歷五谿

源洋文卷八

墓誌銘

五

毒淫之地上霧下潦不遑啓處及抵昆明諸道大帥畢集主客兵以萬計所需靡履糧糗芻芑之屬稱是咄嗟取辦公手口拮据頭鬚畢白未幾而疾作然猶殫心區畫密疏請禁擄掠以收民心辛酉五月初八日病革遺疏以奉職無狀不能報國恩不及見減賊為憾又疏薦雲南布政使王繼文自代蓋是歲十月而雲南平去公之卒僅五月耳

上聞震悼賜祭葬如例以繼文代公巡撫公素廉謹及歿於軍中遺橐祇十餘金行李蕭然雲南提督桑格公與貝勒將軍督撫諸公共扶助之始間

關萬里歸於故園悲哉公性恬退與物無競淹卿  
寺十餘載處之夷然泊拜撫滇之命雖慷慨赴軍  
義不返顧然微察其顏色慘澹與故人言若永訣  
者予心訝之蓋是時公生父通政公年八十矣絕  
裾而行陟岵而悲公之懷抱有不敢以告人者卒  
之以身殉國未竟厥施詎不痛哉公在臺二載屢  
有章疏率多削稿所存按晉奏議若干卷嘗輯錄  
本朝四十年來名臣奏議若干卷未成書皆藏  
於家喜樸晉人帖合處入能品生以天啓癸亥五  
月十七日卒以康熙二十年辛酉五月初八日年

漁洋文卷八 墓誌銘

六

五十有九配何氏累封淑人子三人作楫作霖作  
德女六人王啓澤李嗣貞王啓大王啓演李瓊鮑  
秉謙其壻也孫六人應聘應徵應召應麒應掄應  
舉曾孫二人清濤清溥以二十二年十一月十七日  
葬於新城西北五里邢莊之 賜阡系之銘曰

井鬼之墟王良策騎希蹤嬰翫效尤吳淖鐵橋開  
道金精呈瑞 帝咨上卿持節往帥維此遺黎庶  
其有旣舟無弭懼駟不頓轡馬革疆場誓平僭偽  
賈志未伸歿而猶視哀哉勞臣以死勤事北極

恩綸東園祕器華表嶙峋石闕巖巖後有觀者視

吾銘誌

敕授文林郎掌山西道事山西道監察御史  
彤臣傅公墓誌銘

經言卿大夫之孝曰口無擇言身無擇行如是而已矣此蓋言其常不言其變若天倫之間所遇不偶終其身幽憂怫鬱而卒以孝聞卿大夫或不幸而出於此也若吾友侍御傅公之孝能使朝堂知之鄉國稱之海內之人共信之嗚呼豈偶然哉公諱辰字蘭生一字彤臣別號麗農世為新城潘孟店人明初徙居高樓店曾祖現祖納謨世有隱德

三〇七字

漁洋文卷八 墓誌銘

七

父世準以公貴 敕贈文林郎山西道監察御史  
母焦氏 敕贈孺人事具太傅金文通公謨誌初  
焦孺人夢旭日入懷而誕公生而岸異讀書目十  
行下終身不忘家苦貧卒業華嚴寺僧寮寒暑不  
輟受知學使者項公清溪錢公允器之屢試壓其  
儕偶崇禎壬午省試中副車文名藉甚時邑人士  
方舉從社公年尚少已為職志繼舉曉社因社皆  
執桃茆為盟主歲甲申 世祖章皇帝定鼎 詔  
下郡國選拔真才入成均學使者澹菴房公首以  
公充賦時江北初定判銓者頗懸異格以待公不

層就益肆力爲文章十三經二十一史旁洎諸子裨  
官之書舟次部居無不博綜辛卯中省試乙未舉  
於禮部丙申筮仕河間府推官明允爲畿輔第一  
浹歲之間五登薦剡丁酉奉 特旨行取 世祖  
章皇帝御試者再戊戌授山西道監察御史己亥  
巡視南城丰采凜然是歲掌山西道事凡熱審

朝審哀矜折獄多所全活庚子奉 命按江西道

出河間遮道攀轅者數千人公題詩驛壁云直道  
餘風今尚在士民接踵問平安其感人之深至此  
舟抵彭澤饒九道陳君韓遴入白事請間曰九江

兵且變奈何公詰曰餉足乎曰壓餉七閱月矣公  
笑曰有司之罪也能辦兩月餉乎曰可公曰事濟  
矣疾馳湖口詰朝逆風而渡鎮卒列營東郊將弁  
屬橐鞬迎道左公具威儀而入盛服坐堂皇將弁  
入謁畢大聲諭之曰西江無事日久將懦兵驕其  
由來者漸矣然兵仰於食兵不用命率由枵腹庾  
癸之呼豈得已哉吾奉 天子命按茲土入境即  
知此地缺餉七月有司玩愒行當按之今先給餉  
兩月汝等將卒皆宜畏法紀遵約束脫有偃蹇三  
尺具在吾不汝宥立名九江守給餉如額士卒皆

震動感泣事遂解散其從容定變如此方次第按部綱舉目張而撤差之 旨下矣公聞命襍被就

道辛丑念繼母周太孺人春秋高遂陳情歸養太孺人性卞急自公諸生時不輕假顏色公柔色下氣或長跪終日俟太孺人意解乃敢退既貴居子舍益恭謹人以為難甲辰葬贈侍御公盡哀盡禮四方觀者莫不歎息公流涕曰葬之厚何補養之薄哉公既痛贈公與焦孺人不逮養所以奉周太孺人者無不至問衣燠寒朝夕奉敦牟進甘旨疾痛苛癢不去左右雖年五六十猶孺子也庚申太

漁洋文卷八

墓誌銘

九

孺人病亟公行年七十猶朝夕侍太孺人病尋愈而公病作矣又四年遂捐賓客嗚呼悲哉公平生多神異諸生時有巫覡為社鬼所憑公至即避去曰傅公正人也辛亥冬公得寒疾危甚夢觀音大士以甘露灑其頂曰君至孝格天當延壽一紀已而脫然又十二年而公歿異哉公長身修顙目光如電聲欬作洪鐘響每羣賢高會掀顙談笑上下千百年如指掌四座盡傾昔人經神腹笥不能過也為人忠信樸直胸無籬棘嘗訓諸子曰吾願汝輩為道義中君子不願為功名中小人也雅負經

濟一試於瀛海再試於西江未竟厥志而厪以孝  
聞悲夫公自乙未通籍辛丑歸養立朝僅四載林  
居二十餘年日以砥名行厚風俗為事後進一言  
之善提獎成就如恐不及子少於公二十歲髫時  
私為清明憎蚊二賦公見之激賞有過情之譽辛  
卯乙未皆附公後為同籍三十年來道德相勗文  
章相益過失相規交誼庶幾近古今已矣昔子產  
聞子皮卒哭之曰吾已無為為善矣嗚呼豈不痛  
哉公所著奏疏二卷古賦一卷詩文集二十卷詞  
曲二卷詩話二卷讀書涉筆二卷硯田漫筆四卷

漁洋文集卷八

墓誌銘

十

三才子

續筆二卷姓譜增補十卷韻府補遺六卷增訂堯

山堂外紀一卷新城軼事一卷傅氏博考一卷藏

於家生於萬曆三十二年五月二十四日卒於康

熙二十三年九月二十六日得年七十有一以順

治十四年三月 覃恩敕授文林郎元配胡氏贈

孺人繼配田氏封孺人子二用霖汝霖女三人適

劉沂于允昱伊矩孫四人景范景蘇景韓景歐用

霖等以康熙二十五年三月十八日葬公於城西

北賈莊之新阡來請銘銘曰

尼父有言行在孝經孰其嗣之曾閱是承嶽嶽傳

公名世代興埋輪都亭雅志澄清中歲詠懷歸臥  
巖扃白華朱萼比潔敷榮七十而慕孝通神明人  
之云亾邦絕老成粲粲樂石刻此新銘敢告惇史  
吾言足徵

誥授光祿大夫光祿寺卿介岑龔公墓誌銘  
康熙二十四年春戶部尚書侍郎等上言邇者錢  
穀徵輸條目多而版籍繁兼有尾數冗雜官吏易  
作姦請屏除舊弊更造簡明全書示天下奏聞  
天子曰可咨於九列舉練達 國計之臣董其事  
於是僉謀以光祿寺卿龔公充監修官公先取江

南州縣徵科最繁者刪薙梳剔歸於至簡次及山  
東尾數悉除慮昧者反以為不便乃援唐元和四  
年元稹同州均田狀作收零積餘議書未成公疾  
作卒於京師公初仕為龍驤衛經歷出知安定縣  
事逾年以治行聞擢戶部河南清吏司主事是年  
以 南郊禮成加一級歷戶部江西清吏司員外  
郎遷兵部武科清吏司郎中尋出為山東按察使  
司僉事分巡直隸通水道居五年擢江南布政使  
司布政使累加級一品舉天下卓異第一入 覲  
還旋被 內召未至除大常寺卿改光祿寺卿公

之知縣事也至則舊令罷黜以逋賦未去者二十一人道縣事不可爲涕泣語公公笑曰天下寧有不可爲之地乎及按籍則逋賦五年矣縣徵銀例有羨公曰革此是要譽也置積於堂存以抵舊賦繇是積逋悉完舊令得免罪歸民之流移者咸復乃繕學宮葺民居立市集修驛務清囹圄焚刑具於庭上官胥吏無敢下縣徵索者其入爲戶部也管通州西倉倉有蠹號黑白檔子遇八旗給俸先與交通故爲爭擊往司倉者不能禁輒避去委出入於胥吏公至立唱籌法日坐倉門驗出入倉蠹

不敢作姦差坐糧廳首禁牙戶毋治帳具取償運丁凡運米在石埭曰經紀在土埭曰車戶奸民爲之魁渠指供億官長爲名率稱貸於龍斷者迨給腳價錢則魁渠與龍斷者析而有之公至革魁渠揭運米榜經紀車戶姓名於衢以次呼之預給腳價錢運者得無困又漕糧抵埭旣輸倉例有篋羨銀給運丁先是俟米入廩完日始給則運艘已回弁受其利公驗漕舟起運即呼運丁以篋羨銀給之漕舟歡鉅焚香於岸者千人勒碑交頌公德其官兵部也掌三司印務京察稱職居一等其分巡

通永道也兼司空運廳稅課公周知其弊駟僉交  
憚公楊起龍潛京師謀為變事發伏誅於時告訐  
者蠡起民有賽社者製儀仗迎神為怨家所訐公  
取驗悉焚之轅門外富家子為盜牽連拘之則其  
貌不類公察其偽令僕三五偕富家子並立俾盜  
識之盜誤指僕為富家子寃乃白平寇將軍出師  
自潞河南下塗方積雪公念輓夫寒飢分遣僕隸  
載饌饌五車給之飲以薑湯輓夫懽騰於路察哈  
爾叛公勘羽書恒至夜分置郵供餽無缺晨起念  
三河縣令甫之官未識其人遂懷白金二鎰以匹

馬自隨馳入縣城縣令方詰窘乏策公畀以金為  
區置乃還蒙古兵經通州公慮為民擾列軍校道  
旁持白挺俾按隊入城擊出隊者市不改肆九門  
水口圯僉估須七萬金公往勘謂三千金可集事  
修冷口邊牆估減類是伶人黃丁者投旗下橫行  
鄉曲貸錢運戶強留其子女為僕妾人畏避之會  
軍興有例輸烏槍者官議敘公首以百竿進加二  
級吏胥入賀公曰若等知我意乎我非藉此為榮  
也令甲責旗人者當降級我今可以撻黃丁矣吏  
胥多與丁淫還潛誠之匿不敢出三等侍衛達爾

馬詐傳 勅百公解其佩刀執送吏部其在江南  
甫至督造戰艦湯斯祚者販木商也要結權勢長  
揖見督撫臧否官吏以治烏船為媒恣伐民間墓  
木一日謁公語及私公起據案坐呼皂隸持撻將  
撻之斯祚叩頭乞哀乃遣去未幾以慙憤死江南  
北旱潦公請帶鉞折征 命未下先檄州縣停征  
且為粥食餓者會有 詔蠲田糧督撫議富家不  
蠲公謂富民無一定里胥報未必實若質庫鹽筴  
皆有定稅欲於力田之民求富者實之則騷然不  
寧矣先是土有雜稅有司倍蓰征於民公按其科  
則廣為勒石江南素尚侈公以習俗之奢婦人為  
甚禁士民妻妾不得用金珠犀玉飾釵珥器禮有  
縛采為亭翦紙象人鳥獸之屬及拔河走馬掉險  
竿為戲者悉禁之守藩六年發滇黔楚粵閩饒六  
百餘萬未嘗後期營米必按汴地近遠分給勸課  
農桑力行常平義社倉糶田至三十六萬餘畝增  
人丁至二萬六千餘及率計吏入 朝疏言腹地  
蘆洲與濱江有別不宜槩文同時計吏凡五十疏  
天子獨俞公所奏焉其為太常卿也 陛見 命

行禮於 中和殿既受事修會典更樂章 遣祀

與祭齋香帛步中規矩其為光祿卿也寺雖設漢  
官案牘皆清書公飭筆帖式凡公文悉譯漢字禮  
部移取外藩供應率不用印公不可須用印乃發  
寺歲造官酒取度支米二萬餘石復需帑金萬餘  
采麴釀公誼酒局止酒鎗一具計窮歲不過燒酒  
十萬斤其餘皆沽之市遂上言於 朝凡 郊廟  
讌享用官酒餘用市沽歲省米二萬石帑累千金  
公性孝友執親喪盡禮與弟同居五十年未嘗析  
箸李自成陷京師公靡所依倚主塾師王氏家既  
而王歿惟留一少妾公與其飲食寢無帷薄之隔

漁洋文卷八 墓誌銘

十五

三万九十二

經年不亂見婦女俘獲者輒出私錢贖之築武林  
義莊於廣渠門內建育嬰堂於三山門外置義田  
收租入以哺孩提之棄於道者其為善若不及嚴  
於取與錢穀出入一以平常有大帥愠公乘公發  
鑲疑權衡未足密遣人索營弁所領銀則銖兩不  
爽提調武闈有遊擊入幄將有所干訶之出縣令  
請見公望其行步蹒跚若負重者斥曰汝懷中非  
金耶吾豈受賂者亦不効汝以沽名也薦屬吏必  
以公不徇私好故多得人性喜聚書江寧學宮明  
德堂北舊有藏書板殘闕公選諸生磨勘補成完

書數百卷又雕 欽頒四書講義以行其為政持  
論利未可遽興當先祛其弊故所至有異績焉公  
諱佳育初名佳胤避 皇太子睿名改今名字祖  
錫晚又字介岑杭州仁和人曾祖景鵬祖應嶽考  
勤庶皆不仕以公貴俱累贈至光祿大夫曾祖妣  
祖妣皆一品夫人配李氏封宜人贈一品夫人  
有賢行先公卒子一翔麟好學有文中康熙二十  
年順天鄉試副榜侯補主事女一嫁舉人餘姚邵  
瓊孫一肫生於明天啓二年九月丁巳卒於康熙  
二十四年七月丙戌卒之日橐無餘資次年翔麟  
乃扶柩歸以某月日葬於青龍山之原予嘗與公  
同為戶部郎公入為卿寺予官祭酒與公父子情  
益親於公之葬翔麟請銘不忍辭銘曰

公浙產廬江千年十五乃之燕宅爾宅城東偏遭  
坎軻卒自立掾東堂奮等級牽絲行執戟入視天  
庾領儲胥公所至聲有餘除武庫贊中樞左輔雄  
倚觀察峙糗糧賦藁靺息爭訟執趨黠牧江表政  
更優剛不競柔不絀宜報最宣殊猶金綺賜倍曩  
昨衣織袞章以鶴飲茶膏 體仁閣歷太常光祿

卿人高車公以萃人孔揚公不盈征輸法算未渺

民也愚胥則狡蹙數贏但中飽大農言 帝曰俞  
孰善是編成書僉言公衆不如公之廉僚吏準公  
之心夙夜謹公之才試未盡登臚任歲則多郭無  
田廩無禾有哲嗣能克家青龍岡神所舍漸江水  
走其下魂歸來娛大夜詠吉日宜子孫伐貞石鏤  
吾文百千禩銘斯存

誥授朝議大夫四川按察司僉事六如南公

暨配田恭人合葬墓誌銘

康熙二十六年某月日渭南南毓涓以其世父鼎  
甫狀走二千里來告曰涓世父嘗備官於朝公清

三之三  
漁洋文卷八 墓誌銘

十七

直諒為世聞人不幸遠宦邊徼遭時大亂瀕於死  
者數矣冒潦溼犯霜露出九死一生幸而得歸歸  
而病且死死無三尺之孤昔曾王父廣川君行述  
於先王父司空王父年錄世父述之今世父平生  
行實湮沒弗彰責在小子四世兩門以姪狀叔悲  
哉世父歸自蜀年六十餘老矣涓一日從容請立  
後世父嗚咽流涕曰吾家四世伶仃在子惟吾在  
孫惟汝苟汝克舉孫使主吾後不斬先人祭祀足  
矣安望其他言未竟涕泗交頤下涓泣家人皆哭  
失聲涓遂不敢再請世父未病數言生平心相知

惟今國子祭酒王先生將來以墓道之銘累之世  
父歿倡以治命走京師而先生宅憂歸濟上非先  
生言世父目且不瞑予奉書泣下其忍不銘按狀  
南氏之先自晉入秦世居渭南田市里正嘉間瑞  
泉先生大吉姜泉先生逢吉兄弟皆進士起家講  
明橫渠之學姜泉生陽谷先生軒嘉靖癸丑進士  
由翰林歷官副使著書滿家陽谷先生有四子次  
憲仲萬曆甲戌進士官止棗強知縣是為廣川公  
次師仲萬曆乙未進士官禮部尚書是為宗伯  
云宗伯生居恒官生早卒即君父也廣川生居益

萬曆辛丑進士歷官工部尚書世稱二太先生君  
少孤撫於司空司空無子以君弟廷鈇為嗣則涓  
之父也君幼而方嚴雖兒戲造次必整容七歲居  
宗伯憂如巨人喪祭以禮八歲通經史日誦唐人  
詩八家古文為文章有根柢年十五補縣庠生有  
聲崇禎己卯中副榜讀書北雍亡何丁甲申之變  
司空殉節廷鈇亦死君哭踊絕復甦風雨漂搖譙  
羽翮尾幾無室家順治丙戌中陝西鄉試受知益  
都孫文定公累上公車不第謁選人得柳州府推  
官時龍城尚阻聲教隨大軍駐桂林奉臺檄閱兵

亡賴子詭冒尺籍坐糜軍食甚衆君令魚貫以進  
間一詰籍貫年齒入伍月日率倉皇無以應遂盡  
得實而汰之一軍驚服無敢譁者又奉檄攝昭平  
卻例金千餘弗受以六條厲學宮以五事諭百姓  
巡按御史田君歎曰南君三日昭平勝他人數載  
再攝平樂墾荒均徭如昭平之政大兵入龍城攝  
知府事首布 朝廷威德明示 詔書以綏柔遠  
人之意粵兵驕橫民多去市井匿深箐中君慷慨  
與將帥約盡破文武藩籬同心戮力為 國家奠  
南荒計於是流人漸集犛獠輸誠者二十餘都諸

源洋文卷八 墓誌銘

十九

三十九

生崎嶇自歸者九十餘人柳僻在徼外訟或不兩  
造而以賄免君懲其弊不遣一役下屬邑至即庭  
鞫立罷遣之囹圄一空報最為諸郡第一稍遷同  
知河間府怡然曰吾入粵親故送酒水上皆相視  
流涕罷酒訣去以為此生不復相見在柳再病皆  
製繇今幸生還北渡洞庭初望不及此吾敢負丞  
哉其在河間也直道事上間有齟齬侃侃以去留  
爭之不少貶入為戶部浙江司員外郎遷禮部主  
客司郎中皆以廉幹聞會蜀撫請增設四道擢分  
巡松威道按察司僉事龍安古陰平地松潘居岷

山之陰高山大谷番回雜處君推心置人腹中益  
申明約束郡縣守令緩賦稅省刑罰與民休息民  
戴之如私親尋署按察司事赴成都甫兩閱月而  
滇南告變偽檄至大吏集議君斷斷持之曰死耳  
敢污偽命以上辱 朝廷下辱家門哉賊知不可  
強遂聽解官賃居城南趾不達城市者七年先是  
君左足不良於行至是增劇吉都督孫略者君姻  
家為謀橐餽車馬始歸秦歸日嘯咏芝山酒水之  
間自號六如老人癸亥冬十一月十九日方命酒  
無病而逝得年六十有六君內行修潔事必師古

年十四迎田恭人於頻陽六禮皆如古不惑流俗  
葬司空及弟鈇於新市皆如禮孤兒幼女撫之如  
己出嫁嫁以時幼受經郭先生伯固郭既歿教其  
子修羽為諸生振羽授室生子其力行古道皆此  
類也渭南南氏關中之望人門不可梯接君生於  
富貴澹泊清儉其天性疏直不立城府當官剛勁  
不可撓折與人交初若孤峻難合久之更樂其坦  
易予在禮部與君同省署君固落落獨引予為同  
志以蜀臬入 覲京師未至前數日夢君執手殷  
勤道契闊已而君至笑謂元白梁州之事無異也

君善書多著述所著壽樂園集金臺玉壘岷江諸集如千卷藏諸家元配田氏天啓壬戌進士御宿公女勤儉嚴慎克相夫子累封恭人生萬曆乙卯九月十七日卒康熙十九年庚申十一月二十一日得年亦六十有六以再從姪毓溥子士棻為後毓涓志也銘曰

終南之陰河渭之陽石麟辟邪鬱鬱相望宗伯司空奕葉用光唯公祔之陟降在旁南山峩峨渭流湯湯公之流風山高水長

誥授大中大夫河南布政使司分守驛傳鹽

法道參政涓村杜公墓誌銘

明天啓中有直臣曰江西左布政使杜公詩以不建逆奄魏忠賢祠罷聲聞天下事具國史方伯公生贈參政公若昧有子七人君行在第三諱濂字子濂別字涓村世濟南濱州人生而英特方七歲塾師授李翰蒙求讀竟悉諳其典故十一歲補博士弟子員丁父艱服闋中順治乙酉鄉試丁亥復行會試 賜同進士出身筮仕真定府推官君年甚少恆山又畿南望郡數決大獄爰書如夙習老吏亡敢詆謀者張忠勤公存仁以兵部尚書總督

直隸山東河南調集諸道兵平榆林賊覆其巢穴  
凡所俘獲皆付君執評君言於制府謂大亂之時  
脅從者衆渠魁旣戮餘者當使歸農以布國家  
威德一切殲之徒獲曠土何益獄成多所縱釋尚  
書初疑之旣而寤謝曰君年少敢肩鉅如是吾不  
及也所全活數千人居三歲以治行高等考授禮  
科給事中先是河決荊隆口東北趨海水勢溢  
入東兗濟南諸郡灌縣邑官亭民田凶算君抗疏  
論劾河道方某請專遣大臣行河且言疏上游以  
去其壅導支流以殺其勢然後乘水涸併力塞之

疏入得

旨特命工部尚書劉昌工科都給事中

許作梅往監視數月底績又疏言瀕河田土被水  
患最酷宜停徵以甦民力皆報可在掖垣十閱月  
疏數十上會有旨以廷臣出親民事君與焉補  
分守溫處道參議處在萬山之中俗僻陋而溺女  
淹喪錮婢三事尤為民病君朔望集士民反復開  
諭為改畧葬婚嫁之禮一從儉約女婢滿二十歲  
責其擇配俗為之變遷副使備兵通薊通密邇京  
師豪室巨猾膠牢固結號為難治君不茹不吐風  
流令行僕區法嚴民易罹罪為立保甲之令什伍

相保奸無所售司密薊兩鎮餉絕腹削之弊秋杪  
例一點兵飲食秣莖無所驛騷有冒名尺籍者祀  
剔無隱將弁畏愛之至於催漕濬河不憚勸勤王  
文通公永吉督倉場恨得君晚會天津道屬小園  
漕艘失事諉罪通薊遂奪二級註誤去官事尋白  
復以副使備兵淮海兩淮鹽筴甲天下官其地者  
率緣以為利鹽艘自場捆載之真州例由備兵使  
者驗放君曰鹽有專司吾何與焉吾自有海防與  
民事耳言於巡鹽御史力辭之自是驗放專歸轉  
運人服其廉又出私錢造救生船高竇湖中以拯

覆溺全活歲數百揚屬十縣各置義冢五畝貧民  
始獲葬地羣歌舞之會有裁并之 旨改補巡視

寧紹海道至是凡再渡浙江矣時初改文武相見  
禮徃徃相抗不下君至即交歡大帥兵民帖帖亡  
詬諍者遷分守江鎮道左參政兼攝龍江西新二  
關既又遥攝揚州關務持大體捐苛細值淮揚方  
築埧濬河課稅不登而裁并之 旨又下矣家食

十二載居母憂盡禮三年喪畢補分守開歸道參  
政兼理驛傳鹽法時滇黔用兵乘傳旁午驛騎告  
斃者接踵君檄各驛於額外得倍畜之官給芻秣

又請開府咨部令諸州縣得市馬塞上馬既蕃息則又時其水草節其勞逸又創追鋒車以贏駕之省馬力之半中州食鹽舊分隸長蘆河東山左兩淮四運司厲政多端而緝私販為甚越本邑一步則捕之煎土一斤則捕之巡役攜鹽密置人家則又假乞水火誣捕之君察知姦私以律反坐鹽政肅然先是君鞅掌王事勞瘁致疾會羽檄交馳不敢以休沐請康熙辛酉冬雲南平巡撫中丞以君病入告遂致仕歸四年卒君性孝友與兄弟析產田取其近先壟而瘠者宅取其故者先祠在焉

曰吾以便奉祭祀也叅政階得廕子舍子而任其弟杲嘗以母夫人命置篋室詢知其士人女也贈險而嫁之夙負知人鑒戊子順天同考首得周體觀為海內名士為推官援孫承恩於理為給事中免吳國對禮部磨勘更推獎之順治戊戌二君皆進士及第執弟子禮終其身家世工書君書尤道媚得大令之神詩有奇氣類山陰徐渭南城陳允衡撰國雅取君詩壓卷人以為定論君風流儒雅吐屬無一俗語顧當官屹屹不可搖撼在淮海時某中丞者細人也惡君強項數較轢之終不為屈

生天啓壬戌六月十九日卒康熙二十四年乙丑  
十一月初八日得年六十有四階大中大夫歷官  
河南布政使司參政贈祖父皆如其官祖母程贈  
淑人母張累封太淑人配孫氏累贈淑人繼齊氏  
累封淑人男子二人亮曾知縣章曾太學生出爲  
人後女子六人崔林琮李顥王士彪王澄閻有縻  
李容麟其壻也以康熙二十六年十二月十六日  
葬於城西北祖阡杲亮曾來請銘銘曰

城南之杜去天尺五下杜樊川多名宰輔遷於琅

槐始別為祖巖巖方伯涕唾闔豎文孫繼之繩其

漁洋文卷八 墓誌銘

三五

二五七二

祖武居門下省袞職是補一斥不復觚棱夢阻歷  
試江海甌越吳楚梁宋之郊人歌杜母大難旣平  
公亦解組海山兜率爰復其所渤海之濱如堂如  
斧觀彼九原吾將誰與

帶經堂集卷四十六

帶經堂集卷四十七

歙門人程哲校編

新城王士禎貽上

漁洋文九 墓誌銘

誥授奉政大夫廣西分巡左江道按察司僉

事李公墓誌銘

公諱允禎字貞甫別字修菴其先贛人後遷濟南之德州曾王父汝棟隆慶庚午舉人王父煥太學生考嗣美贈奉政大夫工部員外郎李氏之世至方伯公逢時始大方伯為御史有聲明世宗朝嘉靖庚戌屢上書言兵事其後出按宣大力言馬市

三石印字

漁洋文卷九 墓誌銘

一

非是忤大將軍仇鸞事具前史自方伯至公凡四世公少而端重不妄言笑稍長嗜讀書湛於古學工部侍郎程公紹見其文異之崇禎癸酉舉鄉試數困公車順治元年除知故城縣改知豐縣遷兵馬司指揮歷工部營繕主事虞衡員外郎屯田郎中擢廣西左江道僉事以病致其政歸歸五年卒其為故城路當子午會國初征勦四出舟車驛騷公按符而給民不知病縣戶丁額二萬餘鼎革後死亡過半而額証如故公編審得見丁七千有奇餘悉除去始至豐吏盛陳金幣於署公曰此餌我

也卻之縣民囂訟者羅織富人輒破家公請於監  
司臺受牒必下之縣鞫得誣罔杖斃其魁劉某  
等於通衢訟以衰止豐民某妻美而豔其僚壻富  
豪也挑之不從又詬厲之豪怒賂盜引某誣服矣  
公閱案牘所坐止一布疑之夜微行入獄有二人  
闇中偶語收案之即豪也詰得其奸立釋某而寘  
豪於法甲弟死利寡婦之產賂乙自誣與婦姦公  
下乙獄遣甲與婦歸其家久不為理而令獄吏私  
於乙曰甲與弟妻已均產釋惡矣及即評先呼甲  
案前語叱之退繼呼乙至佯怒曰據甲供狀乃強

姦強姦罪當死趣下重囚獄乙謂甲賣己懼吐實  
遂正二人罪有兄弟訟田直在弟而吏數直其兄  
公反其獄而責以太義二人慙悔痛哭遂為兄弟  
如初其治獄明決皆此類河決徐州臺符下徵柳  
萬束例派里社公曰吏樂從事民將弗堪但下教  
借牛車數兩吏不測所為以請公曰豐西鄙十里  
許有柳蕃衍數百畝無主者刈取之足辦此矣事  
集而民不知太學生吳某連土寇陷碭山監司才  
公俾攝其事屬以辦賊公出不意掩捕獲之餘黨  
解散株連者悉置勿問越數日濟上軍至聲言且

屠城公具牛酒扉屨犒師數十里外其帥欲入城  
覘賊公曰罪人已得餘皆赤子何勞大軍為力持  
不可縣境以安其在工部督造端門工成進秩

賜文綺廢馬督清江廠船政潔廉自矢材美而工  
良窮丁無力供造有繫累瀕死者盡釋之暇則復  
清江書院以造士歲饑設三廠以食餓人全活萬  
計公自縣令歷郎署陟監司所至以幹局見稱而  
廉聲流聞孚於神明格及盜賊其事往徃甚異嘗  
夜自碭山渡河遇賊艘知為公也相戒勿犯赴粵  
舟次小孤山風起水湧長年無入色公仰天祝曰

某平生自信俯仰無愧否者神當覆吾舟語畢而  
風止待 命岳州愛岳陽樓風物之美遂居之午

夜恍惚若有神告曰速去甫移居而樓火公少事  
王父父母以孝聞既舉孝廉盡推產與其弟歸里  
後杜門謝賓客訓課子姓門以内皆有禮法數語  
以祖宗忠厚勤儉之道或以橫逆來輒異語謝之  
不較也鄉鄙皆以公為長者生以明萬曆庚子十  
一月十一日酉時卒以康熙元年九月二十六日

已時得年六十有三娶宋氏贈宜人繼趙氏董氏  
封宜人子三人浹順治丙戌進士芮城縣知縣宋

出濤康熙乙卯解元丙辰進士翰林院編修潤廩生董出女子一人適教諭趙珪董出以康熙四年二月十五日葬河東祖塋系以銘銘曰

試當盤錯古循吏任不大昌功則沛令名無窮年不逮有子式穀及苗裔我銘其藏視萬世

勅授文林郎河南道監察御史趙公暨配房  
呂二孺人合葬墓誌銘

康熙丁卯冬前河南道監察御史趙君卒於里第逾歲其孤澤普以狀來泣請誌隧道之石君仕順治之初予尚童穉及予通籍於朝則君歸田間

漁洋文卷九 墓誌銘

四

三九七

久矣故予與君平生弗習也然竊聞鄉人言君為政於家四十載事繼母至孝友于兩弟范暉所稱成名立方而可書獨行者君實有焉最君門內一節已足信惇史傳後世況其表表者不但已也君諱班璽字受介別字餘菴益都顏神鎮人也其始自北崖泉徙高祖考龍泉公敬簡嘉靖丙午舉人鞏昌府通判曾祖考肅齋公爾待萬曆癸酉舉人金華府推官皆有名蹟祖考服休考世熠諸生性倣儻教子甚嚴君倣儻過其父而事親孝謹嘗大雪侍簷下雪沒脛不敢退早補青州府學生員為

文章敏妙絕人或列置數題數人環給筆札徐行  
口授一時並就文采爛然人輒無能效者順治乙  
酉舉鄉試第四名明年釋褐成進士時世祖章  
皇帝定天下初行制舉詔禮部貢士自庶吉士  
外拔其尤二十人授科道官君在選中補河南道  
監察御史出按四川時秦寇賀珍武大定等出沒  
秦鳳沔漢間褒斜道梗君募壯士數十身帕首握  
刀跨馬日馳百餘里度隴坂之險間道崎嶇達漢  
中至葭萌賊翻天鷄者據危投石不得過君諭以  
朝廷威德降之時成都尚未內附以保寧為行

省治所君抵閬巡撫都御史李勤襄公國英暨總  
兵官馬化豹嚴自明惠應詔等諸大帥皆在易君  
儒者以軍事嘗君君為指畫隴蜀要害且言大兵  
埽除寇孽之後不事戰而事守填撫之術不以兵  
而以將某以書生受天子命在行間誠無所事  
事願諸君功罪可入告也遂閱軍實饗士卒單騎  
按行諸壁壘丰采凜然衆乃懼服按部順慶萬縣  
賊數千北走遣精騎迎擊破之通川南路已而惠  
帥營卒毆民幾死君捕而笞之一軍盡甲君上疏  
劾奏曰全蜀當獻賊蹂躪之餘戶口殆盡臣按部

所至唯見黃蒿塞路白骨盈城耳蜀地先叛後服  
自昔而然今天威震疊新入版圖惟恃封疆文  
武大吏招徠有方申明約束使兵民相安西南可  
幸無事總兵官惠某桀驁自恣縱兵殃民跋扈飛  
揚漸不可長非痛加誅譴臣恐禍亂之萌方自此  
始是時姜瓖反河東連延關內疏久之乃得達得  
俞旨既復命尋按山西未幾召還辛卯七月

丁父憂歸遂罷君歸而奉母怡聲柔色御食佐餽  
扶持抑搔如孺子太孺人安之忘其非已出也篤  
愛兩弟易衣共覲不減古人置田授宅過其子鄉

漁洋文卷九 墓誌銘

六

里化之顏鎮富山水暇即登臨置酒召親故飲弈  
絲肉間作尤喜獎藉後進以藝文就質者丹鉛甲  
乙與壺觴錯互經其指授率得雋去丁卯十一月  
示微疾卒年七十配房氏繼配呂氏俱前卒箴管  
簠以先介婦前後齊軌子七人澤普澤鼎澤旭  
澤愚澤同澤壯澤漸女子六人李唐瑚仇祖孫子  
仲韓聰臨高之驢其適也一朱字孫七人允彬允  
莊允正允智允禮允冲允祺以康熙二十七年十  
月十七日合葬虎埠崖之祖阡系之銘曰

譬于越出匣而未竟其用我特書之視君陳與張

仲

誥封昭勇將軍童太公墓誌銘

予居京師於交游士大夫間稔聞雲麾將軍童君求我之賢童君之子又受經吾友中書舍人李君之門故予知童君家世尤悉舍人嘗為子言童君父瑞芝先生今之古人也已聞先生卒童君方病亟又以毀卒於是士大夫聞者莫不咨嗟太息適舍人以先生諸子狀來請誌隧道之石不可辭則撫其實而書之按狀先生諱庚年瑞芝字也其先蘭谿巨族九世祖以明永樂間徙北平隸籍錦衣

衛為京師人數傳至贈武略將軍完初公是為先生父有子七人先生長也少讀書有名諸生間已念父老慨然徙業稍習計然之術事武略色養慎終宗族稱孝諸弟多早世與鑾儀裕成君相友愛白首無間言教童君兄弟如嚴師口授孝經小學應對進退皆有禮法童君既服官環衛益勉以忠孝大義順治丙申年五十有七即以家務付諸子語之曰吾夙昔有向禽之志今其時矣結茅西山之麓當水石佳處與二三禪衲徃復叩擊結忘言之契春秋勝日蠟屐扶筇探尋夔絕見者以為雷

次宗劉遺民之流也晚構草廬數椽在鹿鳴澤中  
日焚香默坐而已去京師百里歲亦不一二至也  
己未春童君兄弟迎養歸里第夏四月以疾終於  
正寢春秋八十將易篋顧諸子曰生死晝夜耳勿  
過悲婦女各歸室勿亂人意惟一二老友以善吾  
生者善吾死顛畢矣遂遽然而逝先生為人忠信  
樸直與人交久而能敬嘗面折人過退無後言取  
與一介不苟有德必酬其或負己者坦然忘之不  
較也武略在時或以金相付託其人死且久訪其  
子孫倍予之蓋嚴於義利之辨如此以長子蒙古

官雲麾使初封武略將軍進封昭勇將軍生前明  
萬曆庚子十月十八日卒康熙十八年己未四月  
十一日配楊氏故錦衣衛百戶其澄女子三人長  
蒙古鑾儀衛掌左所雲麾使後先生卒次蒙利太  
學生次蒙貞兵馬司指揮女子四人長適邵陽縣  
丞陳貞次適太學生亢文光次適丁宣茂次適候  
補主事張猷孫八人金粟金莖金章金鑑金華金  
璧金奎金鑣曾孫二人潮潤以康熙十九年三月  
初一日葬左安門外三里墳莊寺前系之銘曰

先生之志寧靜澹泊先生之身貞觀丘壑八十年

中不愧不怍神遊太初翔乎寥廓我觀九原逝者可作

侯選知縣馬君墓誌銘

康熙二十年十一月二十五日渠丘馬君三如卒  
瀕易箴頌屬子石麒曰吾即死必阮亭子誌吾墓  
既而石麒持狀匍匐千里將父治命予交君兄弟  
三十年矣雖言之不文不忍辭按狀君諱長春三  
如字也世為青之安丘人九世祖四公卜居城東  
五里河一日樵於壠次有虎伏林莽眈眈然四公  
祝之虎遽弭首去人稱虎林馬氏七傳至中丞公

漁洋文卷九 墓誌銘

九

文煒明嘉靖壬戌進士歷官都察院右副都御史

巡撫江西以功名著聞是為君曾祖中丞有子三

人長應龍與弟給事中從龍俱成萬曆壬辰進士

歷官禮部精膳郎中平生著書數百卷號稱博雅

是為君祖禮部生廣文孟道是為君父君少穎異

又家多賜書與從父弟澄承其家學以古作者自

期從給事公受三禮又從萊陽宋澄嵐先生遊與

諸宋給事琮侍郎玫相後先名日起後入大澤山

讀書遇掖人王漢上下其議論交相重也一日歸

給事問所與友對曰有王子房者讀書不事章句

知霸王大略將相才也未幾王登第不數年至都  
御史死兵間世謂君知人崇禎甲申之亂挈家南  
渡客金陵時中原板蕩四方名士猶集留都皆與  
結納久之北歸鄉里順治丙戌秋再舉鄉試遂薦  
於有司數困公車不以屑意治圃數畝有古木數  
百章修竹千挺又植昌州海棠紅梨各一株於草  
堂之側布袍草履日婆娑其間樂而忘老性嗜茶  
茶具必精好嘗書名茶客至論文輒自前點飲客  
以爲樂蕭然欲友陸鴻漸段碣之流於千載之  
上友人韓君為長興令邀過之君笑曰吾當為嶰

茶往耳行滕負筥入洞山顧渚間身雜茶人采焙  
傾橐中裝悉以製茶其漫興如此法書名畫繇鼎  
之屬過眼輒辨時代徃徃典衣易之遇亂崎嶇避  
地必以自隨邑人李氏有古鼎君嘗借觀倉皇南  
渡及河得之囊中曰吾歸未有期寧以一物失信  
故人耶遣使數百里負而還之君清真簡遠望之  
如晉宋間人然言動必遵古禮少養於王母辛安  
人辛安人曰此子生而知禮當使學禮因授三禮  
之學於給事公云嘗定祭儀一卷躬行於家人取  
衷焉甲申奉兩尊人避賊瑯琊山中晝負母而逃

夜則負米山外往徃至終日不食親亡後有時食必墓祭然後敢嘗見平生琴瑟几杖脂澤奩具之屬輒嗚咽流涕江南王良年流寓北海死先生為營塋槨墳墓養其母終身宗族親戚倚以婚嫁者尤衆族弟某粥田先生既數歲矣一旦呼語之曰吾受此田懼汝幼不能守也今毋慮矣以還汝劉丙妻某氏夫死誓不嫁其伯強之不從號於塗先生遇而問之改容曰貞婦也乃欲奪其節乎禮而而養之為畢男女婚嫁趙某者家貧將粥妻妻抱泣先生聞而止之曰已受直奈何先生立以十緡

償之妻不得粥歲大侵縣欲報富戶以賑貧先生請於令曰富戶報貧者未必濟乃富者亦貧矣令悟事遂已平生厚德不勝書書其梗槩如此君與澄皆以詩名澄前卒其詩多散佚康熙庚申君寄予五言詩一章予酷愛其語似孟東野亦賦五言寄之未踰歲而訃至嗚呼悲哉君既因公車康熙庚戌隨例試吏部得縣令需次而卒生於故明萬曆三十四年七月二十五日距其卒得年七十有六

娶高氏繼娶高氏子一石麒麟女子一適韓知靜孫一維駒先生彌留時所命名也所著竹香齋集若

千卷藏諸家系之銘曰

遠紛華適真素七十年蛻風露汶河之濱有封樹  
後之過者式君墓

待封徵仕郎文學陸先生墓誌銘

先生姓陸氏諱敷樹字映萼別字賁菴唐宰相宣  
公三十三世孫也世居嘉善縣東北奉賢鄉稱奉  
賢支宋迪功郎伯玉公諱瑀者有子四人皆致通  
顯始大其家王父繼林鄉飲賓父維祺太學生世  
有隱德母郁孺人生母黃孺人先生幼篤學黃孺  
人感心疾十餘載屢籲天請代孺人卒攀車輶欲

以身殉父太學君曲譬之乃泣涕受命久之學使  
者按郡或引禮經庶子在父之室則為其母不禫  
之文勸就有司試泣謝不應鄉黨稱孝焉君母郁  
孺人病肯鍼藥皆不瘳公日夕舌舐之目復明人  
以為孝感事父母極色養居器日進一溢米三年  
未嘗見齒撫兩庶母弟遠樹恆樹無間言先生天  
姿穎異為文以具區石簣為法西江黎公博菴督  
學兩浙待以國士名日起一日游雲栖遇異僧謂  
君骨相有厚福第不獲身貴耳自是無干祿意課  
子榮登榮科讀書每至漏下四刻引燭令歸寢

乃寢康熙庚戌榮登成進士歸誠之曰古人顯親  
非科第之謂其謂資父事君造福民物庶於祖德  
詩書兩無負耳吾三十年前見一村農受貴家豪  
奴捶擊吾廡其族望密以告得釋免否者斃老拳  
矣士大夫置身高倨外言不得入惟左右狎近是  
聽不至流毒鄉黨不止小子識之性儉朴斷齷脫  
粟怡然樂之終身不置妾媵徒步出入里門值故  
交野老與談夙昔道桑麻晴雨長吏下車一通姓  
氏不復請謁尤敦故舊業師某歿久未葬手為營  
窀穸封樹凋卹貧乏無倦色津梁道路圯者陂者

身任修葺常大書為善最樂四字置座右焉己未  
弟遠樹歿以哀致疾遂不起所著四子精義世滋  
堂文集輯古今人四六各若干卷嘗讀王介甫集  
至先大夫述舉示榮登曰子不可諛父是文足以  
法矣榮登志緒言故述先生行實而可信生明萬  
曆三十九年十二月十二日亥時卒康熙十九年二  
月二十五日申時享年七十元配盛氏子二人榮  
登康熙庚戌科進士廣東英德縣知縣榮科庠生  
女一適楊雋標孫四人起蒼起蔚起苞起芳榮登  
以辛酉年十二月十八日卜葬奉賢鄉麗字圩東

南阡祖塋之次遵治命也銘曰

貞元宰相之子孫流風奕葉傳清門繩其祖武昌  
後昆身雖歿矣道則尊我銘其幽無愧言後有知  
者觀九原

賜進士出身高君暨韓孺人合葬墓誌銘

陶弘景自言永明中求祿得輒差舛不爾豈得為  
今日之事姚平仲出奇計夜斫營壘一不中騎青  
羸夜馳七百里入蜀青城山人謂仙去不死予嘗  
論之使貞白得祿仕為校書郎不免與沈范齊列  
平仲功成名立不過中興名將爵徹侯耳孰與仰

青雲睹白日之樂耶淄川高君釋褐成進士脫屣  
一官輒棄家入勞山居上清宮晏坐終日餌芝朮  
侶援猱渴飲溪澗之流久之有所得歸臥一樓人  
罕梯接其卒也預知時日殆亦貞白平仲之流與  
君諱瑛字介如別字逸叟其先蒙陰人徙淄川會  
王父柳溪先生汝登德行稱於州里王父中丞公  
舉萬曆庚辰進士巡撫浙江都察院右僉都御史  
父所翔光祿寺署正君少有名場屋順治甲午中  
山東鄉試康熙丁未舉禮部時君羣從兄弟方貴  
盛人謂可驟躋華膺君笑不應躡屩五百里止海

上二勞山究道德參同之旨著放言集平生忼慨  
重然諾其師孫文學逋官糧立解裘贈之同年長  
清董君有弟役旗下脫左驂代贖直白金他如董  
政鄒昇霄張思泰輩所焚券不可訾算撫孤甥王  
超安克類外弟王之駮自髫髻迄成立里鄙誦義  
焉又嘗出私錢葺文昌祠修龍虹橋置義學義田  
其樂善不倦如是平居教授生徒多成名士登甲  
乙科數人子之駮亦舉省闈其訓駮之言曰吾家  
自柳溪公發畏天之學中丞公敬承之家始大汝  
祖汝父率由罔斲以有今日人亦有言從如升堂

違如赴壑戒之哉人以比唐華原柳氏君之歿也  
白頰更黑人以為異生以天啓辛酉二月二十三  
日卒以康熙二十三年甲子十一月十五日年六  
十四配韓氏淮安府同知競秀女天性儉素終身  
無金翠文組之飾撫諸姑遺孤皆時其婚嫁嫁兄  
女五人無異己出人以為難生以天啓癸亥二月  
十一日卒以康熙十七年戊午閏三月二十一日  
年五十六子一人之駮康熙甲子舉人女子二人  
一適唐夢師一適張倬慶孫四人肇修太學生肇  
豐肇仕肇倅曾孫一人光緒以康熙二十五年九

月一日葬淄城北之新阡銘曰  
以天地爲蘧廬深味道腴其山澤之癯耶其列仙  
之儒耶

容城縣教諭趙君墓誌銘

君姓趙氏諱明徵字哲公其先吳人也明初以軍  
功世襲錦衣衛曾祖輅歲貢生祖光遠以醫名明  
神宗朝為侍直始籍大興父士通精於易著易圖  
說學者稱潛夫先生有三子君季也君自束髮出  
語即驚其長老閨門孝友人無間言尤重交游然  
諾潛夫先生慕沈青霞之為人學其畫梅淫往奪

真然頗自秘惜一日寫一枝於縑素自題絕句云  
桃杏色相別李柰性不同一發寒香後四子稱下  
風以授君君受而藏之益自刻厲執經於藁城彭  
進士三益而與宗太守彝宋戶部翔為友甲申逆  
賊李自成犯京師君扶母胡太孺人抱姪於篁避  
臺溪廠太孺人坐淺水中曰急則就深死一賊馳  
馬過之君以身翼母而蔽篁於右腋賊射君中胸  
太孺人倉皇欲投深淵君忍痛拔矢曰兒無恙也  
力持母起匿他所以免鼎革後潛夫卜居濟南顧  
謂君曰吾東西南北之人也顧西山丘墓在焉子

歸矣其代我伏臘祭祀勿缺君於是獨歸京師奉  
祀事歲時集諸父昆弟祭畢而觴曰吾有親而離  
居為祀先也後之子若孫日即於疏祀或不畢集  
憂喜慶弔或不相徃來合族之義其謂之何嗣是  
修祀事唯謹族用敦睦潛夫有兄士美業岐黃老  
而貧君構室備藥物家具以娛其老如事潛夫先  
生友人劉國亮貧士也病且死泣謂君曰吾母年  
七十吾又無子天乎奈何誰養吾母者君撫之曰  
吾與君為友子母吾母吾在子何戚即子不言吾  
已心許之古人不忘風諾尚挂劍墓樹而況託子  
以母乎劉死君葬之養母於家終其身以是君孝

漁洋文集卷九 墓誌銘

義之名聞都下順治甲午與兄吉徵同舉順天鄉  
試明年不第省父母濟南丁酉遊江寧病卒年僅  
三十有七君卒後部選得容城教諭元配潘氏繼  
配楊氏苦節三十年撫孤子于京于蕃皆成立巡  
撫中丞疏聞於 朝奉 旨建坊旌表君可以含  
笑入地矣君生以天啓辛酉正月十一日未時卒  
以順治十四年丁酉四月十六日辰時子三人于  
京康熙辛酉山東舉人于申早卒于蕃廩生女子  
三人長適房俊次續嫁皆卒次適翰林院侍讀蕭

君惟豫孫二人鶴禎鼎祺以康熙己巳閏三月初九日葬濟南玉函山之麓銘曰

骨肉復於土魂氣則無不之朝垂回風暮載雲旗裴回乎西山先靈是依

文林郎內丘縣知縣吳君墓誌銘

君諱瑄字舜玉別字西濤其先棗強人也明初從濟南之長山曾大父文魁永平訓導大父三戒吳橋教諭識范文忠公景文於諸生終階州學正父凱縣學生贈文林郎平順縣知縣母沈氏封太孺人君生而朗雋為諸生好任俠已然諾交遊甚衆

家雖貧廓落有大志常慨然慕季布劇孟之為人即有急赴之甚於己私昏夜叩門未嘗以有無為解故人人樂與之遊年二十名已在諸公間矣戊寅遭文林公喪濟南被兵君奉母奔迸山間造次不廢書順治辛卯中省試己亥成進士丁未除知平順縣縣在太行山谷中無桑麻絲枲之利君行田見山多榭樹曰是可蠶也自其家移蠶種教民以收養繅織之法踰年人食其利縣磽确乏水泉祇二井隸官民汲十數里外君為鑿池二各廣百步清冽而甘居人便之鄰縣大猾某犯法誼

闕投匭部下之郡無敢窮其獄者上官知君才以屬君君毅然繩以法絲髮無所貸其任職有心力皆此類居二載遭太孺人喪服闋壬子除知內丘縣地當子午君為治視平順而加詳密以暇日修學宮進諸生與論文藝有杜異芳者負士也君憐其才推挽之成名士會滇黔告變羽檄旁午未幾病卒乙卯內遷需次歸濟南病日甚以戊午十月卒君事太孺人有茅容之風其初中省試也太孺人撫君而泣君亦泣平居出告反面如孺子予每往來君家習見君所為如是未嘗不太息交遊無

貧賤富貴終身不易為孝廉時師事故太子太保大司寇李公李公卒哭之盡哀在內丘日聞劉鶴林中丞先兄西樵考功之訃適有公讌為流涕罷酒父母之器致車千兩平生赴人阨困為友人撫遺孤甚衆未可一二數亦不自伐以為德也太史公曰緩急人之所時有也士窮窘而得委命此豈非世之所謂賢豪間者耶君抵掌談笑往鄙鄉曲之儒抱咫尺之義姝姝煖煖自名聖賢之徒一旦有緩急舉世無足恃者故自其少時任俠自喜欲以矯流俗之所為而兩仕終為令不及大有所

表見噫其可悲已君生以天啓辛酉十二月初七日卒以康熙十七年戊午十月二十五日年五十有八娶安氏封孺人繼劉氏耿氏封孺人章氏子三人長榮長源長城女三人適李有之王啓沉李斯比孫二人弘勳弘協以某年月日葬某阡銘曰俠耶儒耶千里誦義而家無儋石之儲耶仕終百里利劍而以拄車耶萬年之藏在此墟邪

葉母張宜人墓誌銘

康熙戊午黃州葉君井叔以博學鴻儒徵留京師其妻張宜人歸武昌明年井叔報罷南歸宜人已

前歿於是井叔哭之哀以書抵其友濟南王士禛俾誌墓中之石予讀之悵觸而悲昔吾妻張恭人之歿予在京師恭人且死恨不及與予相見數顧視牕間日景因嗚咽流涕覆面今井叔悼亡之悲與予同其情事又同語云悲者不可為繫獻子於宜人何能已於言哉按狀宜人姓張氏吳之常熟人父凌虛翁雲鳳母陳氏凌虛翁為廣濟典史免官僑居武昌之樊口而井叔之父錦林先生亦籍吳之嘉興官黃州衛經歷因相與為婚姻癸未闖獻二賊交訐於楚闖賊別將陷黃陂巡撫何公騰

蛟檄先生往攝縣事已而獻賊陷蘄逼黃州井叔奉母太宜人渡江至武昌依翁以居黃州陷翁攜兩家老弱走樊湖賊舸踵至宜人遂與父相失乙酉先生遷知永明縣尋棄官湖居憐宜人之賢謂太宜人曰此凌虛翁愛女也今其家凋喪至此藐孤爲吾家婦當善視之宜人亦婉孌柔順能得翁姑之歡家貧屢空闕甘旨然菽水菜羹必自烹飪而敬進之事太宜人十有一年始終無間年饑往采藜藿噉糠覈別以小罌爲飯進太宜人而已嘗不飽太宜人患喉痺時天大雨雪井叔阻異縣

宜人朝夕侍命長子道復披冰雪求藥草療之卒不諱則擗踊哭盡哀歲時伏臘追思輒泣涕不已其孝敬如此井叔爲諸生館里塾宜人有兩子一女紉箴澣濯舂汲炊爨皆自爲之順治辛卯井叔下第歸宜人泣語曰君之貧極矣姑暮景望君成名亟矣曷勉之丙申春正月井叔將赴江夏謀食於故人夙興待旦坐地爐間寒甚爇茅柴啜粥仰天喟然曰天乎曷俾吾妻孥少免飢寒不至此極乎因泣下霑衣宜人曰君不嘗稱昔人牛衣之事耶兒女雖凍餓未嘗敢告瘁以傷君心君何不自

激昂而以咫尺之見墮志為井叔起改容謝之丁酉井叔中省試時太宜人已歿捷書至井叔泣宜人亦泣己亥井叔成進士除延平推官宜人偕之官久之改補登封知縣稍遷兵馬司指揮宜人居恆以毋忘貧賤時相勉故井叔所至潔廉慈惠有循吏聲丁巳井叔遷主事需次京師明年被薦召試宜人以九月歸楚次明港驛而病絕復甦歸數月幼孫德滋紹孫貽孫女孫鴻兒相繼痘殤宜人屢哭之慟病復作遂不起康熙十八年十一月十五日也先是宜人食貧時常有嘔血疾及之延

平又患氣痛歲一二舉發至是增劇彌留之際願諸子女歎曰嗟乎我與而父共甘苦三十七年今已矣不得復面矣淚下如綬縻既屬續目猶視諸子女哭慰再三始瞑嗚呼其可哀也宜人人生以明崇禎戊辰距其卒得年五十有二初封孺人進封宜人子男二道復武昌縣學生道臨附例監生女子二適王一鯤楊廷燕予與井叔以道義文章為友交誼近古稔知宜人之賢而以貧病憂患終其身尤有足悲者為略其德與言之槩如此冀以慰吾友且以慰宜人於地下銘曰

生於吳葬於楚媼於姑舅克相夫子由困而享胡  
不偕老樊山之陽大江之澣佑爾後人百世无咎

帶經堂集卷四十七

六十一

漁洋文集卷九

墓誌銘

二十三

帶經堂集卷四十八

歙門人程哲校編

新城王士禎貽上

漁洋文十行狀 行述

誥授中憲大夫陝西分守河西道布政使司

左參議毅州王公行狀

公姓王氏諱天鑑字近微別字毅州其先江寧縣人始祖政明洪武間官宣府左衛正千戶遂占籍為宣鎮人曾祖元春世襲千戶祖朝彥太學生父道舒萬全都司學生封承德郎禮部儀制清吏司主事母劉氏贈安人公生而清羸如不勝衣母置

漁洋文卷十 行狀

一

膝上口授孝經論語輒成誦為諸生婁冠其儕偶順治二年舉順天鄉試明年舉禮部除知恩縣恩故貝州地居河北山東要衝明永為盜藪寇至令長輒率居民空城去常一歲七失守公甫下車進耆老諭之曰往歲之失由人無固志耳賊何能為自今勿復逃視令所向賊數萬奄至城下方坐城樓從容指麾賊疑有伏解圍去於是治樓櫓浚壕塹為門五為樓二十有八又申約束嚴候望時巡徼浹旬守具大備公又曰賊所以得狂逞者由無以禦其外也乃按行鄉鄙舉古田役追胥之法

立寨十有九枹鼓相聞旬日間得步卒萬八千人  
騎士三百戰具亦備賊根株窟穴悉除自是無敢  
犯恩境者巡按御史特疏聞於 朝巡撫都御史  
屬公得自治兵是時榆林賊未平濟西東兗諸賊  
所在竊發遙為聲援公廉得縣境賊渠數輩乘夜  
馳至其鄉以馬箠叩戶呼其名甲乙無一誤者賊  
錯愕出不意皆拜堂下願效死因盡得其情實與  
嘗通賊者禽誅之其發姦植伏皆此類也他邑有  
寇警都御史輒檄公往賊聞其名至咋指相戒賊  
據曹縣都御史督諸道兵會勦公率所部為前茅

親冒矢石深入賊地諸軍繼之遂復其城一日追  
賊急陷重圍顧從者十數騎冰中矢且盡日暮賊  
大至合圍數重公殊死戰手殺傷數人潰圍出不  
失一騎馳至一村村人詢知為公也駭曰適神祠  
中泥馬自汗公豈得神助乎視之信然公在恩數  
年與賊大小戰凡數百合馘俘招撫無算盜賊屏  
息其在行營也又嘗救趙氏諸婦女完其家室活  
孝廉耿某幼姪歸之不絕其世釋管永祥等冤獄  
他如招徠流亡復業以數千計墾荒田至千八百  
頃建育英書院俾諸生以時絃誦其中其貧而廢



出視畿輔學政按上谷公不與通既竣事生徒無  
王氏子弟蕭謁公乃知公禁弗與試且曰師弟契  
闊數年評寒溫一語足矣豈以子弟相累蕭君視  
畿輔學廉正為本朝第一亦公有以成之也門  
生或有餽遺卻弗受曰飭簞簞惜名節舉主食報  
不淺矣林臥二十五年始終一節物望益高康熙  
十三年戶部侍郎魏公象樞薦於朝公一再辭竟  
不就居憂盡禮撫兩幼弟皆成立家居恤姻黨贍  
宗族代畢婚嫁者甚衆魏公謂其有上馬殺賊下  
馬草露布之才有一介不取一介不與之守晚年

涵養智深勇沈駸駸乎近於聖賢之自反者人以  
為篤論公生以天啓壬戌六月初一日亥時卒以  
康熙二十年辛酉六月二十日子時得年六十配  
張氏封安人子一人袞太學生女子一人適張松  
年孫一人公虞明萬曆間先太師公節鉞鎮宣雲  
與公之曾大父有通門之舊予雖未及見公然少  
聞鄉先生言長吏廉直有幹局者必首公又聞公  
辦賊方略甚具雖漢之尹趙無以過也而公里居  
亦時時為人道子姓字彌留之際屬胡先生洎弟  
錫言吾即死必王子狀吾行嗟乎公何以信予言

至是哉公門人以文章功業知名當世者項背相望宜狀公以公易簣鄭重之語誼不可負也因不復辭件繫事跡冀備史氏采擇謹狀

世父侍御公逸事狀

世父侍御公諱與胤字百斯大父方伯公次子也崇禎戊辰進士改翰林院庶吉士授湖廣道監察御史奉命巡鹽河東歸再命巡視茶馬著隴首集多憂天憫人之言尋視學南畿拜命未行上疏劾總兵官鄧玘縱兵殃民請斬玘以謝豫楚百姓玘蜀人也恃奧援縱恣所過淫掠甚於賊疏上果大

忤政府罷歸歸治東園壘石為小山穿渠引水有若天然構流雲仙衣諸亭繚山上下春秋佳日輒奉方伯公籃輦出游甘為農圃以沒世又皈心白業精舍數椽左右列竺乾珠藏之文面壁輒終日甲申三月聞流賊陷京師泣涕不食買舟利津之三汊將浮于海聞海道梗夜起投水為家人所持不死買冰片潛服之又不少乃舍舟歸里笑謂家人曰吾不歿矣家人信之伺少怠夜半登樓與孺人于氏子廩生士和同縊死甲申四月二十六日也留絕命詞壁間遺命薄葬公死時年五十六孺

人少於公一歲士和年二十八傳有之謀人之軍  
師敗則死之謀人之邦邑危則亡之古今天經地  
義所不得而逃焉者也公以放廢之身似可以無  
死而必歿乃屢瀕死而不歿終百折不易其志而  
以一歿下報故君且與妻子從容俱死嗚呼可不  
謂得死所者與 世祖皇帝既定天下俞魏公裔  
介請明末北京死節之臣大學士范景文等二十  
二人皆予諡而公死於家無狀公逸事以告史館  
者公死時士禎方年十歲稍長與四方賢士大夫  
遊恐世父之事遂湮沒而無傳也既乞能言者為  
誌表傳贊自禮部尚書錢公謙益而下凡若干人  
載之家乘謹狀如右秉筆者冀有取焉

誥封朝議大夫國子監祭酒先考匡廬府君

### 行述

嗚呼痛哉昔歲壬子吾母恭人見背不孝等心絕  
志悲而不敢稱鮮民者以有吾父在也今又十三  
年而吾父祭酒府君復奄棄藐孤已矣無復望矣  
上堂弗見入室又弗見已矣已矣鮮民之生不如  
歿之久矣荒迷痛疾恨不先驅螻蟻地下復痛念  
同生四人士祿士祐皆已前歿府君未竟之志當

在不孝兩人不取不忍死敘述冀府君平生言行  
稍表見於萬一府君諱與勅字欽文別字匡廬世  
居青州之諸城古琅琊地也始祖琅琊公諱貴始  
徙新城爲新城人再傳善人公諱伍多隱德嘗植  
槐於門夢神人以簪笏纍纍布其上顧曰以報汝  
善人公生潁川公諱麟始以明經起家仕終潁川  
王府教授潁川公生忠勤公諱重光登嘉靖辛丑  
進士仕至貴州布政使司左叅議以采三殿大木  
平黑白羿蠻勞於王事歿贈大僕寺少卿忠勤公  
生司徒公諱之垣登嘉靖壬戌進士仕至戶部左

侍郎贈本部尚書自潁川公已下三世皆以太師

公象乾貴累贈少師兼太子太師兵部尚書太師

公母弟方伯公諱象晉登萬曆甲辰進士仕至浙

江右布政使方伯公四子府君季也初方伯公元

配成淑人生先世父茂才公諱與齡侍御公諱與

胤明經公諱與朋繼配張淑人生府君而早逝方

伯公尤憐之府君至性過人幼事方伯公備極孝

謹讀書具夙慧早歲受知提學項公夢源自後李

公喬湯公道衡汪公漸磐翁公鴻業相繼視學齊

魯皆以國士期之從方伯公遊宦京師四方益與

其名士縞紵贈答聲譽日起甲申世祖章皇帝  
定鼎下詔郡國拔其才貢入太學提學房公之  
麒首以府君應選時中原初定判銓者頗懸異格  
以待而府君以方伯公年八十老矣茂才明經二公  
旣前歿侍御公又身殉國難遂絕意仕進一赴廷  
對不謁選人即歸侍方伯公子舍柔色下氣雖帚  
踰必躬澣灑歲時率子孫奉觴上壽一堂五世融  
融如也方伯公好舉祖宗勤儉遺事以訓子孫府  
君退而反覆申繹其說以命不孝兄弟期不孝兄  
弟讀書勵行早有成立以無墜方伯公之教其言

源洋文卷十一 行述

八

甚痛順治戊子先兄士祿舉鄉試辛卯不孝士禎  
繼之壬辰士祿舉禮部方伯公顧之喜而後府君  
之心稍愉快也至乙未士禎舉禮部癸卯庚戌士  
祿春秋再捷府君輒愀然痛方伯公不及見癸巳  
方伯公捐賓客年太耄矣府君執罌哀甚蔬食三  
年杖而後起每歲時伏臘家祭上冢必愴慕盡哀  
三十年如一日也庚子二月不孝士禎之官揚州  
府君謂曰汝年少爲吏且李官也民命繫焉慎之  
慎之吾將視汝是歲八月分較南闈闈中得危疾  
已在死法府君顧復鞠育至廢寢食凡三閱月而

有瘳嗚呼痛哉欲報之德昊天罔極雖廢蓼莪其  
能須臾忘哉不孝士禎官揚州五載府君日以欽  
恤為訓不孝受命唯謹幸免隕越皆府君教也壬  
寅先恭人就養廣陵癸卯士祐舉東省士祿典河  
南鄉試取道省覲不孝士禎又分較武闈府君與  
先恭人顧之喜既而悲謂諸孫皆成立而方伯公  
不及待也乃繪方伯公生平出處事蹟為圖二十  
四以示我後人蓋府君終身之慕如此甲辰不孝  
士禎量移禮曹府君扁舟東下尋西泠舊遊訪老  
友吳先生思穆於湖上乃歸里士祿士禎官京師

漁洋文集十行述

九

恒寓書諄諭勉修職業勿忘國恩老人得耕鑿

作息為唐虞之民足矣壬子先恭人棄諸孤惟不

孝士禎侍側已而士祿士祐自京師士禎自蜀奔

喪歸府君撫之而泣所以拊畜之有加迴憶是時

府君在堂兄弟無故雖慈闈棄養而晨夕溫清依

然曩時撫今追昔抑何可得哉戊午正月不孝

士禎蒙皇上特恩召對諭改翰林侍從三年擢

拜國子祭酒府君數數寓書謂聖恩曠世一過

報稱為難勗勉益至不孝士禎以久違定省屢思

請告洗沐弗許也甲子不孝士禎蒙恩擢詹事

府少詹事兼翰林院侍講學士尋奉 命祭告南  
海府君待之荏平起居畢首諭之曰汝一書生蒙

聖恩拔擢至此當益思所以報稱且 聖天子舉

古巡守大典修望秩之禮而以小子即事懼或弗  
虔以負任使汝往矣勿以老人為念明日遂行然  
不孝士禛微窺府君容色肌膚殊減疇昔心忤忤  
然懷歸益切及使事告竣便道過里從容言報

命後當即請假覲省府君猶不見許然意殊愴然  
不孝士禛俯首飲泣不能復言甫旬日府君力命  
趣裝遂發嗚呼痛哉詎謂是日即不孝士禛與我

漁洋文卷十 行述

十

府君永訣之日哉士禛入都報 命朝見後一日

即循例籲 恩歸省得 俞旨私幸侍膝下有日

矣豈意相距十日而府君竟不及待耶易簣之際

亦惟不孝士禛一人侍側嗚呼痛哉府君素少疾

病胸次恢廓音吐如鐘眉長覆目相者謂壽當復

如方伯公自壬子先恭人見背士禛士祜相繼云

亡十餘年來期功之喪無歲無之府君盡然神傷

飲食漸減馴至大故嗚呼痛哉府君平生事親則

孝從兄則敬先恭人歿後室絕侍膳者十餘載教

子姓嚴而有恩每春秋佳日輒置酒邀邑中耆舊

如傅侍御彤臣李京兆仲嘿徐隱君東癡諸公小  
集西堂道舊故為樂羣從伯叔晚年惟天孫先伯  
獨存時時邀與諸兄弟讌集道祖宗勤儉遺事如  
方伯公當日府君之歿也羣從兄弟行哭失聲巷  
舂皆罷是可以知府君之德矣府君少工駢麗之  
文晚年猶間為之中歲好為詩不孝兄弟間請編  
錄輒不許曰吾偶寫懷抱如絃之有音既絃停音  
寂何用留此枝贅為耶府君少教不孝兄弟自制  
舉業外詩歌古文詞縱其涉獵或以為言輒笑而  
不答然里中稱善教者必推府君今琴瑟几杖猶

在而音容邈不可追矣嗚呼痛哉不孝士禎壬子  
奉命使蜀歸而先恭人見背今奉命使粵歸

而府君見背皆行萬里抱恨終天尤鮮民之最不  
幸者民莫不穀我獨何害悠悠蒼天其可問哉府  
君生於萬曆己酉年十月十一日亥時歿於皇

清康熙二十四年乙丑九月二十八日酉時享年  
七十七歲累遇覃恩誥封朝議大夫國子監

祭酒元配先慈孫恭人寧國府經歷孫公杖女婦  
德母儀鄉里楷式詳大宗伯文貞王公少司馬柞  
庭孫公所為傳誌中子四人士祿順治戊子舉人

壬辰乙未進士吏部考功清吏司員外郎卒娶張氏王氏士禧廩例准貢生候選州同知娶趙氏士祐康熙癸卯舉人庚戌進士候選中行評博卒娶焦氏繼娶張氏士禛順治辛卯經魁乙未戊戌進士詹事府少詹事兼翰林院侍講學士娶張氏女四人一適博興庠生劉倬一適鄒平乙丑進士張璽一適淄川庠生畢盛肩女卒一適益都監生趙作肅孫十二人士祿出者二啓演啓浣卒士禧出者四啓溶啓涪啓沉啓深士祐出者二啓涓卒啓灌士禛出者四啓涑啓渾卒啓沔啓沂孫女十二人士祿出者四士禧出者二士祐出者三士禛出者三曾孫十人啓演出者二兆郇兆郃啓浣出者一兆郃啓溶出者一兆柳啓涪出者二兆郃兆郃啓深出者三兆郃兆郃啓涑出者一兆鄩曾孫女十二人啓演出者三啓溶出者五啓深出者一啓涓出者一啓涑出者一啓沔出者一四世孫二人祖章祖年兆郃出

誥封宜人先妣孫太君行述

嗚呼痛哉吾母棄不孝士禧等而逝也奄忽二載日月不居既祥且禫不孝等痛心泣血不能從吾

母地下飲食居處猶然自比於人不孝等罪莫可  
逭昔吾母之歿吾兄在京師嘗為狀略其言曰不  
孝士祿與弟士禎官京師久海內大人先生之官  
於斯與四方文章之士之游集於斯者率多不棄  
不孝兄弟聞母訃咸來徵評母生平將製為哀誄  
之辭不孝不敢以哀亂回惑終不一述以負諸大  
人先生盛心然哀亂回惑且迫奔喪不可久留其  
述之弗能詳也請俟後狀蓋吾兄之言如此兄歸  
數月以哭母得危疾未及小祥溘然追吾母地下  
病且革猶顧不孝等以吾母行述為言不孝等既

痛吾母又痛吾兄甫含毫輒哽咽罷去如是者又  
逾一年不孝等不敢忘吾兄之緒言以歿吾母之  
懿行今葬有日矣謹飲泣件繫事狀備作者采擇  
焉母姓孫氏濟之鄒平人始祖進以下歷金及元  
世為軍民千戶九世祖本當明高帝時逐寇死金  
山下弟雄代之雄以靖難功累遷至指揮使守潼  
關王漢陂為作昭勇將軍碑者其裔孫也而本之  
子孫留為鄒平人世以儒術科名顯自本以下六  
世至棧以太學生仕為寧國府經歷即不孝外祖  
父也外祖母梁舉子女十人母其第四女生而凝

重不妄言笑幼從宦宛陵官舍一日與諸弟妹戲  
遺火室中且然諸弟妹驚走母獨從容以絮被濡  
水澁覆然處火立燔外祖父母以是奇之外祖故  
倜儻多雅遊與伯祖太師公祖方伯公相善也而  
長女嫁為方伯公冢婦祖母張淑人一日過外祖  
家見母器之因使伯母歸為家君禮部公議婚姻  
外祖父母曰是可以壻吾女矣十七來歸時曾祖  
母一品路太夫人已臥疾母三日拜牀下曾祖母  
為一笑曰新婦賢而貴惜吾不及見也未幾路太  
夫人卒母處諸姑如娣間無間言亡不歎太夫人

知人者母自傷不及事姑張淑人其事方伯公寒  
燠以時澣洒必謹方伯公遊宦淮海吳門大梁武  
林必以家君暨吾母自隨朝夕上食非母視寒煖  
弗甘也癸未甲申間帶甲滿天地時方伯公年八  
十矣避兵轉徙異縣母以人獲紉置衣帶中晨必  
手煎進之雖亂離不少倦方伯公性嚴重閨門之  
中儼若朝典子孫輩稍失意輒跪之庭母聞之必  
旁皇立待方伯公不意解則不敢食甲申以後方  
伯公以遺老居田間伯父侍御百斯公殉甲申三  
月之難兩伯父曲江公壽三公又先卒惟家君朝

夕侍子舍方伯公憂門戶中落常為不孝兄弟言  
高曾以來堂構嗣續之難或至流涕母謂不孝等  
曰爾祖耄耄日望汝曹成立汝曹下愚耶吾無望  
焉爾汝曹幸知讀書不至自暴棄當及爾祖無恙  
各自樹立慰老人暮景儻無所及即吾與爾父受  
萬石之養悔可追耶因泣下嗚呼痛哉此言猶日  
在不孝等胸臆間也不孝等每自家塾歸母聞履  
聲輒從牕中呼之聞兒輩今日讀何書為文章當  
祖父意否命列坐於側予之酒食或讀書塾中夜  
分不歸則遣小婢賜卮酒餅餌慰勞之率為常不

孝兄弟每會食輒談藝以娛母母則大喜泊順治  
戊子長兄士祿舉省試辛卯士禛羈貫魁一經明  
年壬辰兄舉禮部時方伯公尚無恙母怡然曰兒  
輩皆有成慰老人意吾願畢矣癸巳方伯公年九  
十三考終里第母佐家君視湯藥浹月不歸寢舍  
襲衾襚必躬必親勿之有悔厥後乙未士禛舉禮  
部癸卯庚戌士祐春秋兩捷母念及方伯公之教  
未嘗不喜而繼之以悲也母舉不孝兄弟姊妹八  
人自辛巳為長兄娶婦庚子送季妹于歸先後二  
十年婚嫁始畢而母之鞠育頽復心力竭矣平居

諸婦女侍恆取高祖母一品劉太夫人閻範圖說  
指示之曰先世以勤儉起家其不敢暇逸如此吾  
之歸汝家也不及見劉太夫人顧猶及見路太夫  
人路太夫人之以勤儉爲教不啻劉太夫人也汝  
曹志之閻範圖說者曾祖大司徒公記高祖母生  
平言行自其佐高祖太僕公於寒素以至大耋教  
諸子姓登科第爲名公卿纖悉畢具後士禎官揚  
州乃命畫史重繪於縑素焉不孝兄弟自髻鬣肩  
隨未嘗離母膝下常春夜侍坐母愀然謂之曰兒  
輩今讀書家塾父母日望攻文章取科第異時遊

官四方動彌年載不相見欲如今日侍父母左右  
其可得耶自非休沐歸或不幸以私艱歸汝兄弟  
欲如今日聚首一堂又豈易得耶不孝兄弟聞母  
言心竊痛之自乙未後諸兄弟服官中外無幾相  
見回憶母夙昔之語徃往悲愴不能已至壬子秋  
不幸罹大故長兄奔器歸自京師又兩月士禎歸  
自巴蜀不孝兄弟始聚哭吾母殯宮之旁而母不  
及見矣痛哉痛哉乙未歲長兄以進士乞改教授  
將赴東萊母誡之曰師道之廢久矣汝但慮德不  
進道不篤懼不足爲人師勿以廣文秩卑而有愠

心焉庚子士禛赴揚州推官母送之澠水上曰汝少年爲法吏吾懼之然揚故爾祖舊游地也吾與爾父少嘗隨侍今三十年風景猶夢寐見之孺子行矣惟爾祖是程俾揚人謂王公有後是吾志也壬寅迎養廣陵時失出法嚴一事被部駁輒至鑄級母則謂之曰人命至重汝但心存公恕升沉非所計也士禛敬受教多有所平反癸卯秋士禛舉省試捷報至廣陵會長兄以吏部稽勲郎奉命主河南解試便道起居拜堂下淮南人榮之明年磨勘獄興兄以无妄頌繫者八閱月母憂甚至廢

寢食及事白省覲於揚母悲喜交集曰大患難後兒乃不瘠老人瘠矣自是晨夕必呼兄與士禛對食榻前視猶孺子且曰兒輩立身服官但求無愧神明無忝先訓利鈍成敗有物司之吾固常以盛滿爲憂兒今身名矍然蒙主上恩放歸田里侍父母餘年吾又何憾是冬士禛遷禮部文明年乙巳士禛迎父母於揚與長兄方舟侍母歸里已酉士禛以儀制郎視權淮上母令士禛偕荀長兄及士禛侍母於家明年庚戌士禛計偕成進士其秋長兄蒙恩牽復再起爲考功郎母以春秋高不

樂就養但時時寄語兒輩服官清白勿忘方伯公之訓長兄在銓曹數年士禛歷官儀曹計曹罔敢隕越則母暨禮部公教也是時諸孫曾成童及在提抱者餘二十人旅進起居母含飴樂之不孝等私喜眉壽可期詎謂天方降割辛亥十一月廿七日忽邁痰疾不孝士禧士祐倉皇延醫禱於神祈以身代已而稍甦但右臂不仁語言蹇澀士禧等迎醫二百里外遣急足之京師士祿士禛遍叩名醫方藥謀請急歸有日矣母語禮部公寓書止之謂吾病良已兒輩作歸計是違吾意非孝也竟不

果請壬子春夏母眠食甚適閏七月家君偶患瀉痢母猶視理醫藥夫何家君甫痊吾母繼病病三日竟以不起時八月初一日也去客冬邁疾之日甯十閱月嗚呼痛哉當是時長兄在京師士禛奉使西蜀士祐適他出未歸獲永訣視含斂者惟士禧一人痛哉痛哉吾兄之歸也泣謂不孝等曰天乎吾乃不得為阮孝緒乎夫吾母教子四十年而不能從容待一日之養人亦有言願欲食藜藿負米百里之外何可得也痛哉母賢明有遠識知大體料事多奇中不類巾幗中人從姑適張氏者老

無子從姊適耿氏者侍御公女也少失怙恃母遇之恩誼有加歲時問遺過於諸女歷三十年如一日性樂施予甲申以前家故粗給庚辛間歲大稔母躬督臧獲作糜賑饑製絮衣衣貧者或夙有逋負至是悉焚其券助家君綜理家政內外肅然家人凜嚴君焉以文行教諸子聞門有長者車轍未嘗不喜度雞翦鬣未嘗不以供客以不孝兄弟無似而坐不乏郭林宗輩客者微母教寧有是耶訓諸女女孫恪執婦功動止皆有禮法鄉黨之言閨範必以吾母為稱首不孝少讀春秋國語至公父

文伯之母嘗廢書而歎咨嗟慨慕其為人今述吾母罔敢有溢辭焉然竊謂於柔正慈和之道備矣不孝同氣八人素無天折丙午畢氏妹死母言輒涕零自是忽忽不樂壬子夏病稍間將為第七孫啓渾娶婦未娶而渾死京邸母聞訃神傷未兩月遂以見背哀樂之於人甚矣嗚呼痛哉自母之逝未一載長兄又以身殉九原有知當復侍母色笑如平生乃不孝等其何以為心哉母生於萬曆丁未八月二十四日未時卒於 皇清康熙十一年壬子八月初一日亥時得年六十有六三蒙 覃恩

初封孺人進封宜人子四人長士祿順治壬辰乙未進士吏部考功清吏司員外郎卒娶張氏王氏次士禧貢生娶趙氏次士祐康熙庚戌進士娶焦氏繼娶張氏次士禛順治乙未戊戌進士戶部福建清吏司郎中娶張氏女四人適劉倬張壘畢盛肩趙作肅孫十二人啓溶啓演啓浣啓澶啓涑啓沉啓渾啓澶啓沆啓深啓灌啓汧孫女十人曾孫四人兆邵兆邵兆邵曾孫女五人

帶經堂集卷四十八

